



Wantok

Namba 2195 Oktoba 6 - 12, 2016 28 pes

Niuspepa Bilong Yumi Ol PNG Stret!

K1 tasol



Oktoba 2016 isu

The Catholic Reporter insait...

P9,10,19 na 20

Business Printing Specials

- Common Seal Stamp** (Customer must produce Certificate of Incorporation) **K66 inc GST**
- 200 x Business Cards** (single sided) **K99 inc GST**
- 500 x Colour Letterheads** **K220 inc GST**

Prices valid until 31st October 2016

Conditions: - Printing only, editing / artwork fees may apply - 4pm next day Pick up (Mon-Fri)

Only at...

THEODIST LTD
THE STATIONERY SUPERMARKET

Waigani Drive, POM
Ph:313 9800
sales@theodist.com.pg

Markham Road, LAE
Ph:472 5488
saleslae@theodist.com.pg

Ileksen plen i redi

ILEKTRAL Komisn i redim pinis plen bilong ranim Nesenel na Lokal Level Gavman (LLG) Ileksen long neks yia, Sif Ilektoral Komisina Patalias Gamato i tok.

Mista Gamato i tok Ilektoral Komisn i kamapim na redim pinis ol taim, de, det na ol ples we ol manmeri husat inap long vot bai makim ol lida bilong ol.

Mista Gamato i autim dispela toktok long kliaim tingting bilong ol manmeri na gavman olsem Ilektoral

Komisn i wok long mekim ol wok long redi long 2017 Nesenel na LLG Ileksen.

"Ol samting i redi pinis. Mipela bai gesetim dispela plen long mun Desemba long larim sampela ol nupela LLG, we Nesenel Eksekutiv Kaunsil (NEC) i bin kamapim, i stap insait tu long dispela plen," Mista Gamato i tok.

Mista Gamato i tok Ilektoral Komisn i no bin kisim fanding hariap tasol taim ol i kisim sampela

fanding, ol i wok long mekim ol wok olsem trenim ol asisten ritening opisa (ARO), ol ritening opisa (RO) na ol enrolmen ejen.

"Bihain long dispela trening, ol enrolmen ejen bai go aut long ol provins, distrik na LLG wot long kisim ol nem bilong manmeri na apdetim ilektoral rol.

Mista Gamato i tok Ilektoral Komisn i:

- holim pinis 8-pela intadipatmen-

tal ilektoral komiti miting;

- Givim ripot pinis long Praim Minista Peter O'Neill na Sif Seketri Isaac Lupari long wanem samting ol i wok long mekim;

- Holim pinis tripela miting bilong ol politikel pati na toksave pinis long wok Ilektoral Komisn i wok long mekim;

- toksave pinis long ol wok manmeri bilong Australian Hai

Komisn, Ambaseda bilong Saut Korea na Amerika, Hai Komisina bilong India na Nu Silan, na wantaim ol arapela stekholda na dono patna; na

- holim pinis tripela woksop bilong ol provinsal ileksen menesa na asisten ileksen menesa.

Em i tok tupela moa woksop bai kamap long Mt Hagen long mun Novemba long dispela yia na long Kokopo long mun Febuari long neks yia.

Long wankain taim, Rejista bilong ol Politikel Pati na Kandidet, Dokta Alphonse Gelu, i tok PNG i gat 34 politikel pati.

"Dispela 34 politikel pati i rejista pinis na ol bai sanapim ol kandidet long 2017 Nesenel na LLG Ileksen," Dokta Gelu i tok.

Em i tok 18 politikel pati i gat ol memba bilong ol i stap long Nesenel Palamen long dispela taim, tasol ol 16 politikel pati i no gat memba bilong ol i stap long Nesenel Palamen.

"I gat 9pela bilong dispela 16 politikel pati i stap long Gavman. Planti ol politikel pati gat wanpela memba tasol," Dokta Gelu i tok.



Moto Kanu long Ramu Wara...

Moto kanu i katim Ramu riva wantaim ol manmeri laik go olsem long Aiome na ol eria long baim buai.

Poto: James G. Kila



BE A LUCKY WINNER TODAY!

CHECK-IN FAST! CHECK-IN ONLINE!

Be in the draw for a chance to win a trip for 2 to Pohnpei, Federated States of Micronesia, with accommodation. Be a smart traveller and check in Online today!

Check-in Online & Win
3x draws! Oct, Nov & Dec



Air Niugini
www.airniugini.com.pg



Avoid the airport queue! Online Check-in is available on www.airniugini.com.pg from 24 hours to 3 hours before departure. Not available for flights departing Australia and Japan.

Polye sori long ol i rausim lapun man

OPOSISEN Lida Don Polye i no wanbel long ol polisman i bin rausim wanpela lapun man long haus bilong em long Hohola long Pot Mosbi long las wik.



Oposisen Lida Don Polye

hainim wanpela kot oda na rausim Oisa Evoa, husat i gat 94 krismas na husat i bin pait long Wol Wo II olsem wanpela Fuzzy Wuzzy Angel.

Mista Polye i no wanbel long ol polis-

man i hesapim em, katim banana, rausim ol kago na ol samting bilong em, na lokim haus na banis bilong em wantaim bikipela sen.

Long Mande long dispela wik, Minista bilong Hausing Paul Ezekiel na Menesing Dairekta bilong NHC, John Dege, i bin go lukim dispela man, na tokim em long go bek gen na stap long bilong em.

“Dispela kain pasin bilong mekim paul pilai Lens Dipatmen i mas stop. Ol man

husat i wok long givim ol len taitel nating i mas stopim dispela kain pasin,” Mista Polye i tok.

Em i askim Praim Minista O’Neill long kamapim wanpela wok painimaut long sekim olsem wanem dispela man, husat i tok em i gat taitel long dispela haus, i bin kisim len taitel.

Praim Minista O’Neill i bin stopim NHC long salim ol properti na tambuim NHC long rausim ol manmeri husat i slip long haus bilong NHC.

Tambu long rausim ol man long haus

OPOSISEN Lida Don Polye i askim Praim Minista Peter O’Neill long tokim gen ol wok manmeri bilong National Housing Corporation (NHC), ol polisman na kot long tambu long rausim ol manmeri husat i slip long haus bilong NHC.

pilai wantaim sampela ol wok lain long Lens Dipatmen na NHC long kisim len taitel.

Mista Polye i laikim Hausing Minista Paul Ezekiel long bihainim toktok bilong Praim Minista na stopim dispela kain pasin bilong ol wok manmeri long NHC i no ken rausim ol man nating long laik bilong ol yet.

Em i askim gen Praim Minista O’Neill long

strongim dispela toktok na putim bikipela tambu long rausim ol man nating long haus bilong NHC.

Long mun Ogas Praim Minista O’Neill i bin tambuim ol wok manmeri bilong NHC i no ken salim haus o rausim ol man nating.

“Olsem wanem na sampela ol wok manmeri bilong NHC i wok long salim haus yet?” Mista Polye i askim.

Wobiro askim kot long marimari

GAVANA bilong Westen Provsins, Ati Wobiro, i askim kot long marimari long em wantaim arapela tupela wokman bilong em na givim liklik mekim save bikos ol i laik bekim mani bilong pipel we kot i tok ol i bin tingting long paulim.



Ati Wobiro

pipel bilong Westen Provsins.

Tasol sapos kot i givim ol liklik mekim save long Oktoba 27, ol tripela man bai no inap

go long kalabus, tasol kot bai tokim ol long bekim dispela mani na tambium ol long stil gen o brukim arapela lo bilong kantri.

Kot i bin painimaut olsem Gavana Wobiro, na tupela man i bin pasim tok long salim K7.06 milien bilong Westen Provsinal Sevis Impruvmen Program (PSIP) i go long wanpela faundesin.

Nem bilong dispela faundesin em Fly Care Foundation na kot i painimaut olsem tripela man yet i bin

sainim ol pepa long larim ol mani bilong developmen i go insait long dispela faundesin.

Kot i painimaut olsem ol i no bin bihainim stretpela rot aninit long Pablik Fainens (Menesmen) Ekt long yusim pablik mani o mani bilong pipel.

Ol tripela man i tokim kot olsem ol i redi long bekim dispela mani long Westen Provsinal Gavman.

Kot bai mekim disisen long Oktoba 27.

Nupela kampani laik baim gol

WANPELA nupela kampani bilong baim aluvial gol i redi long wokbung wantaim ol manmeri husat i save was long ol liklik gol long wara na arere long maunten.

Mt Kare Gold Consultants (MKGC) i redi long wokbung wantaim ol manmeri long Porgera na Mt Kare long Enga Provsins na helpim ol long salim ol liklik aluvial gol long gutpela prais.

Jeneral Menesa bilong MKGC, Warren Kii, i tokim ol manmeri long Mt Kare na Porgera, husat i save salim gol, long askim prais bilong gol long kampani bilong em, bihain long ol i salim gol bilong ol.

“Gol prais i go antap gen. Dispela em i wanpela samting we ol liklik manmeri bilong yumi long ples i no save.

“Mi laik tokim ol long

askim mipela pastaim. Mipela i redi long helpim ol wantaim kain ol namba wan infomesen long gol maket.

“Planti taim sampela ol gol baia i wok long giamanim liklik manmeri long ples. Ol i ting prais bilong ol i pundaun yet na ol i salim aluvial gol long liklik mani.

“Dispela kain pasin bilong paulim ol asples manmeri i mas stop. MKGC i

laik tokaut stret long wanem samting i kamap long intanesenel gol maket.

“Mipela i laik helpim ol manmeri bilong mipela long ples long salim gol long gutpela prais na senisim laip bilong ol.

“Gol i no save kam long isipela rot. Ol manmeri long ples i save wok hat long painim gol long wara na arere long maunten,” Mista Kii i tok.

O’Neill laikim patnasip long turis bisnis

PRAIM Minista Peter O’Neill i askim ol manmeri long strongim pablik-praivet patnsaip long kirapim bisnis bilong turis long kantri.

Mista O’Neill i mekim dispela toktok long las wik Fonde taim em opim nupela haus malolo bilong Madang Resort Hotel.

Mista O’Neill i tok ol manmeri i mas luksave olsem bisnis bilong turis em i wanpela sas-tenebel bisnis.

“Bisnis bilong turis bai stap yet, oil na ges bai pinis. Bihain taim bilong dispela kantri i stap long turis bisnis,” Mista O’Neill i tok.

Em i tok gavman i wok long putim moa mani long kirapim ol rot na



Praim Minista Peter O’Neill

bris, ples balus, sip bris na daunim hevi bilong lo na oda long pulim planti turis i kam insait long PNG.

“Infrastraksa bilong kirapim turis bisnis em i namba wan samting. Gavman na ol bisnis haus i mas wok bung wantaim aninit long

pablik praivet patnasip na kirapim planti namba wan samting long helpim bisnis bilong turis long PNG i gro,” Mista O’Neill i tok.

Em i tok bihain taim bilong dispela kantri i stap long han bilong turis bisnis na dispela bisnis bai holim ikonomi bilong kantri.

Mista O’Neill i askim ol manmeri long stap isi na no ken bagarapim nem bilong kantri wataim pasin no gut ol stil pasin.

“Dispela kain pasin i ken bagarapim nem bilong kantri bilong yumi. Yumi mas wokbung wantaim long larim planti turis i kam insait long kantri,” Mista O’Neill i tok.



Mt Kare Gold Consultants laik baim aluvial gol long Porgera.

“Thanks to my Mum and Flame Flour, I think I’ll go all the way”

EVERY HERO NEEDS A MAMA FLAME

Justin Olam

Flame Flour

Flame Self Raising Flour

Flame Wholemeal Flour

STRENGTH & ENERGY

Sir Julius i tingim bek Presiden- Peres

PASTAIM Praim Minista na Gavana bilong Nu Ailan provins, Sir Julius Chan, i tingim bek laip bilong Szymon Peres, long-pela taim Presiden na lida bilong Isrel husat i bin wanpela wol lida we i save toktok long kamapim bel isi long Midel Is namel long ol Arab kantri na Isrel.

Sir Julius i bin autim tok sori bilong en long taim em i harim long dai bilong Presiden Peres long las wik Trinde.

Em i wanpela bilong ol namba wan lida bilong bilong Isrel politik na lain bilong kamapim bel isi, we tupela taim em i bin stap olsem Praim Minista na Presiden.

“Wol i lusim wanpela bikman, Man bilong kamapim bel isi na man we olgeta ples i gat bilip long en long wol,” Sir Julius i tok.

“Em i wanpela man bilong bel isi na klostu olsem Papa bilong Isrel stret. Em i winim tingting bilong ol pipel long gat bilip long em we i brukim ol banis na lain bilong birua, wantaim mak antap tru,” Sir J i tok.

Sir J i tok, “Kain pasin bilong em long bihainim stori bilong ol pipel bilong em na long politikal lidasip na diplomesi bilong en long toktok bilong bringim bel isi namel long ol birua lain klostu long kantri bilong en i mekim na em i winim Nobel Pis Prais.

“SHIMON PERES i bin stap olsem Foren Minista taim mi bin bungim em,” Sir J i tok.

Long yia 1993, Sir Julius olsem Fainens Minista bilong PNG Gavman i



Presiden Shimon Peres i sekhan wantaim Sir Julius Chan long Tel Aviv, long 1993.

Poto: Media Unit - NIPG

bin kisim wanpela deligesen i go long Isrel long statim ol toktok namel long tupela kantri we i kamapim diplometik rilesens bilong tupela.

“Mipela i bin bung insait long Tel Aviv na lukluk raun bilong mipela we ol i redim, i kisim mipela i go long ol liklik fam bilong MOZAB na ol holi ples long Jordan Wara, Dead Sea, Jerusalem, Nazareth na Maun, Camel wantaim tu wanpela Baha’i Haus bilong Jastis long Haifa. Mipela go long inspekim ol Naval Bot na las tru mipela i go lukim ples we i gat bikipela stori bilong pait long en, “Golan Heights” we i stap antap long maunten we ol bikipela, bikipela pait bilong Israel na Syria i bin kamap insait long 6-pela de pait long 1967.

“Wanpela liklik toktok bilong leit Peres we i stap klia tru long tingting bilong mi inap nau, em tok-

tok bilong em long bikipela siti bilong bipo taim, Jerusalem; ‘Jerusalem em i op long wok bilong lotu tasol long wok politik em i pas,” Sir J i tingim bek.

Em wantaim sampela memba bilong Nu Ailan Baha’i Bilip i bin bung wantaim Presiden Peres long Haifa na wanpela Fiji Komanda, na ol trup wantaim UN Piskiping Fos long boda bilong Israel na Lebanon.

“Baibel graun em i wanpela kain ples bilong em yet; em i wanpela stori bilong bipo i stap laip yet long ol lotu na long ol holi ples. Em i wanpela taim we mi bin go wantaim Sir Noel Levi, taim em i bin Hai Komisina bilong UK na Embeseda bilong Isrel i stap namel long ol Yuropien kantri, na Fainens Seketeri long dispela taim, Gereia Aopi na senia opisa, Babani Maraga.” Sir Julius i tok.

Papagraun no wanbel long Telikom

Peter Larry i raitim

WANPELA papagraun tru bilong Ballam ples long Boikin-Dagua LLG long Wewak, Is Sepik nau i laikim ol enjinia bilong Telikom PNG Limited long stopim ol we ol i wok long mekim antap long graun bilong em.

Lawrence Momin i no wanbel long ol wokman bilong Telikom PNG i no tok-save long em na sanapim wanpela trensmisen tawa antap long graun bilong em.

Mista Momin it ok

Telikom PNG i no kisim tok orait long em pastaim long ol i muv go insait long graun bilong em na sanapim dispela tawa antap long graun bilong em long Ballam.

Em i tok tupela man, Ben Aikin na Ricky Aikin, i tanim olsem tupela i papa bilong dispela graun, na tupela i mekim paul pasin long kisim Telikom PNG i kam insait long sanapim dispela komyunikesen tawa.

“Mi mas tok aut klia long Telikom PNG olsem dispela tupela man i no papagraun

tru bilong dispela graun,” Mista Momin i tok.

“Olgeta manmeri long Ballam, na tu ol manmeri long arapela ples i stap klostu olsem ples bilong mi long Butt, i save olsem ol tumbuna man bilong mi i bin winim wanpela pait na ol i bin kisim dispela graun.

“Dispela graun i nau graun bilong Mogetum klen, wanpela liklik klen bilong Nebenek klen bilong mi,” em i tok.

Mista Momin wantaim arapela ol man long Butt ples long

Dagua i putim ripot pinis long Wewak Polis long tunde na i kisim wanpela priventiv oda long stopim ol injinia bilong Telikom PNG i no ken wok long dispela graun.

Tasol ol wokman bilong Telikom i go het yet na mekim wok bikos ol i mekim olgeta pepa wok na agrimen wantaim Ben na Aikin.

Mista Momin nau i askim bos bilong Telikom long Wewak, husat i bin toktok wantaim Ben na Ricky Akin long kam aut ples klia na stretim toktok wantaim em na arapela ol papagraun long Butt long Dagua ples.

JICA sapotim Edukesen wantaim kar

Paul Zuvani i raitim

JAPAN Intanesenel Koporesen Ejensi (JICA), em i dona ogenaisesen bilong Japan, i sapotim Quis-Me program bilong Edukesen Dipatmen wantaim K115,000 Nissan Turbo long Mosbi long aste.

Quis-Me program Edukesen Dipatmen i laik wok poroman wantaim JICA long ranim inap long 5-pela yia.

Quis-Me program bai kamapim ol teks buk long helpim ol sumatin husat i stap long Gred 3 i go inap long Gred 5 long lainim gut Inglis, Mets, Saiens na Kalsa.

Ol i kamapim Quis-Me program bihain long JICA i pinis long wok poroman wantaim Edukesen Dipatmen long EQiu TV program we tupela i ranim long helpim ol sumatin i stap long Gred 6 i go inap long Gred 8. EQiu TV i stat



Yoshihiko Chujo, senia mausman bilong JICA i givim kar ki long Titus Hatagen, Fes Asisten Seketari, Karikulum long Edukesen long sapotim Quis-Me program. Poto: JICA

long 2000 na pinis long 2015.

Long taim bilong givim ka Yoshihiko Chujo, sinia mausman bilong JICA long PNG i tok wantaim EQiu TV ol i lukim bikipela senis long save bilong ol sumatin long Mets na Saiens.

“Japan i save putim bikipela tingting long edukesen.

“Jica i bin statim EQiu TV, na lukim

planti senis long save bilong ol sumatin.

“Ol i gat moa save long Mets na Sains long ol sumatin husat i no ranim EQiu TV.

“Dispela ol senis i no kamap hariap tasol isi ol i wok long kamap.

“Kisim save i no samting bilong hariap tasol isi i go wanpela i ken lukim ol senis,” Chujo i tok.

Em i tok JICA i laik lukim Edukesen na wei

ol sumatin i kisim save i kamap gutpela.

Long makim maus bilong Edukesen Dipatmen Titus Hatagen, Fes Asisten Seketari, Karikulum i tok tenkyu long helpim bilong JICA.

Hatagen i tok Japan i gat gutpela Edukesen sistem na Papua Niugini i mas lain long wei Japan i save kisim save.



BANK WHERE YOU ARE

WE ARE BSP

A BSP Agent provides you access to basic banking services anywhere in PNG.

Do your banking where you are!



Smuk bilong plastik i gat kemikal no gut

Frieda Sila Kana i raitim

SMUK i kam long ol plastik na ol kain pipia bilong stua we ol pipel long siti i save kukim arere long haus dua inap long kamapim bikpela sik olsem kensa long taim ol manmeri na pikinini i pulim win long smuk bilong en.

Faunda na Dairekta bilong Sastenebel Kostlain PNG, Ryley Webster i tok klia long taim bilong "Klinim Pot Mosbi Kempen" las wik long Lamana Hotel.

Sastenebel Kostlain PNG em i wanpela non-profit ogenesisen aninit long globol Sastenebel Kostlain nem, we i save kamapim ol rot bilong stetim ol bagarap i kamap long envairomen wantaim ol nupela kain projek.

Mista Webster i tok olsem ol pipia i save go raun long olgeta ples. Ol i save kamap long nambis na ol i save pundaun long rot na ol baret wara i save karim i go daun long nambis. i gat sampela samting olsem i save kamap taim pipia i stap long graun.

1. Wanem hap



Lead Singa Jacklyn Joseph Nomor na twin susa Joelyn bekap. Tupela i sumatin bilong Jubilee Katolik Sekenderi Skul. Foto: Nicky Bernard

pipia i stap, ol natnat bai karim kiau na kamapim natnat bilong bringim ol sik olsem malaria, elepentaitis, Dengi Fiva, Zika Vaires na mekim ol pipel sik.

2. Wanem kain we yumi mekim long tromoi pipia em i impoten. Taim yu kukim pipia i gat ol plastik em yu larim ol kemikel we i birua long

helt bilong ol man i go aut. Em i ken kamapim sik kensa. Posin i kamap logn dispela smuk em i olsem man i smuk na rausim smuk 300 taim. No ken kukim plastik.

3. Ol enimal na pisin i kaikai plastik na i dai. Sapos pis i kaikai plastik em bai stap long bodi bilong en taim man i kaikai em i ken kisim sik. "Ol pipel bai lukautim wanem samting ol i sve laikim" olsem na mipela bia yusim drama grup long givimaut dispela toktok.

"Kanaka Tieta grup"

Ol pis i ken kaikai plastik na posin inap go insait long bodi na sapos ol pipel i kaikai bai em inap kamapim bagarap long bodi bilong ol. PNG i no kamap yet long kain taim we ol pis na samting bilong solwara i bagarap long ol pipia bilong stua na pektori tasol em i gutpela long yumi stopim pastaim Inog em i kamap.

"Ol pipel i save lukautim wanem samting ol i laikim tumas," olsem na sapos yumi laikim ples bilong yumi, bai yumi save lukautim gut," Faunda bilong Sastenebel Kostlain PNG, Ryley Webster i tok.

Sastenebel Kostlain PNG bai wok wantaim wanpela lokal tieta grup, "Kanaka".

Eking Deputi Siti Menesa bilong Nesenel Kepital Komisen (C&SS), Ted Lukui tok Edukesen bilong wes menesmen em i impoten long ol yanpela lain long save. Wes Polisi i stap na Wes Menesmen Plen i stap tasol ol pipel i mas senisim pasin.

Em i tok divisen bilong em bai givim sapot na singaut long ol bisnis haus na praivet sekta long kam insait na wok wantaim NCDC long ol "Neighbourhood Program" we i stap nau long ol sampela setelmen.

Long ol skul nau em tripela "R" program i ran i stap. olsem na tupela sumatin bilong Jubili Sekenderi Skul i raitim na wokim wanpela song long tripela 'R' we ol i singim long dispela taim. Na ating bai kamap olsem tim song bilong 'Klinim Mosbi Kempen'.

NCDC Gavana opim 'Klinim Mosbi' Kempen

Frieda Sila Kana i raitim

NESENEL Kapitel Distrik Komisen (NCDC) I patna wantaim Sastenebel Kostlain PNG Inc na opim wanpela bikpela kempen bilong klinim Pot Mosbi siti, 'Klinim Mosbi Kempen'.

Gavana Powes Parkop wantaim Siti Menesa, Lessley Alu i bin opim karamap bilong bena bilong dispela kempen long ai bilong 200 o moa manmeri na pikinini.

Ryley Webster, Faunda bilong Sastenebel Kostlain Papua Niugini i bin opim dispela seremoni.

Mista Webster i tok olsem dispela kempen i bilong skulim ol pablik long bilong lukautim na daunim hevi bilong ol pipia olsem ol plastik beg na ol kontena. Ol i laik skulim ol skul pikinini, ol pipel long seteleman na ol ples insait long Nesenel Kapitel Distrik, ol Motu-Koitabu viles long no ken tromoi nating

pipa, na tu long no ken kukim ol pipia we inap long rausim ol ges no gut inap long kamapim kensa long bodi.

NCDC Deputi siti menesa bilong sosel sevis i tok NCDC i gat wanpela program pinis na i bilong wok wantaim ol skul aninit long bikpela toktok bilong tripela 'R', Reduce, Refuse, Recycle' long yusim gen ol samting we i luk olsem pipia.

"Wes Menesmen hevi i gat planti kain hap, tasol bikpela samting em long tingting na pasin bilong ol man. Pasin bilong ol man em i bikpela hevi bikos taim ol man i stap laip, ol i wok long kamapim pipia yet," Mista Sam i tok.

"Nau mipela laik wokim tim wantaim Sastenebel Kostlain PNG long kisim ol pablik, spots ejensi na ol etlit, ol skul sumatin, ol NGO na ol narapela lain long daunim dispela traipela samting no gut, 'Mista Sam i tok."

Long wankain taim, Mista Alu i tok, em i bisnis bilong olgeta manmeri na pikinini long kamapim toktok bilong rausim ol pipia long siti.

"Yumi olgeta mas mekim sampela liklik wok long helpim dispela kempen. No ken tromoi pipia i go ausait long rot. Dispela rot so em bilong soim ol pipel olsem plening na wes menesmen i ran sait, sait wantaim," Mista Alu i tok.

Mista Alu i tok moa olsem olgeta pipel i mas wok wantaim long lukautim Siti bilong ol.

Em i tok Gavana i bin mekim planti senis insait long 5-pela yia pinis olsem na ol pipel i mas senisim pasin long lukautim siti na lairim e mi stap klin.

"Dispela bai sevim planti mani long wokim ol narapela wok. No ken tromoi pipia. West inap mekim money bikos sampela pipia i ken kamap rot bilong mekim mani," em i tok.



Grup poto bilong opim Klinim Pot Mosbi Kempen bena. L-R Chris Amini, Pastaim Kepten PNG Kriket Tim, NCD Gavana, Powes Parkop, Weitlipta gol medalis, Dika Toua, Ryley Webster, Faunda na Dairekta bilong Sastenebel Kostlain PNG, Deputi Siti Menesa, Sosel Sevis, Ted Luku. Foto: Nicky Bernard.

Redscar Hai Skul laikim sapot

Paul Zuvani i raitim

REDSGAR Haiskul i gat bikpela hevi na i laik gutpela sapot, Haiskul bod ov menesmen siaman Oveai Maino i tok.

Em i tok skul i gat hevi long stretim na long wankain taim i laikim ol nupela klasrum, laibreri haus na tisa haus.

Em i tok hevi bilong dispela ol samting na planti taim skul i no ran gut, na ol sumatin i no save lain gut.

Maino i mekim dispela tok taim em i welkamim ol skul bod ov menesmen (BoM) long 4-pela LNG impek ples em Porebada,

Boera, Papa na Lealea we ol yet i kamapim nupela BoM buk na lonsim long Porebada long las wik.

Em i tok olgeta yia, skul i bin askim ol atoriti na ol lain husat i pas long ran bilong skul long bringim sevis tasol i no gat wanpela gutpela senis i kamap.

"Mi no inap long sutim tok pinga long wanpela man tasol yu husat yu save yu mas helpim long kamapim senis i mas kamapim," Maino i tok.

"Dispela skul i stap wankain olsem ol i bin mekim long moa long 40 yia i go pinis.

"Long ol dispela taim wan wan ol bod ov

menesmen bilong skul i traime long painim rot long kamapim senis long sampela samting bilong skul tasol no gat wanpela gutpela helpim i kamap."

Maino i askim Murray Bell, ExxonMobil Plen Sait Menesa, sapos em i ken askim menesmen bilong em long ol i ken helpim long kamapim nupela klasrum o haus tisa.

Long bekim, Bell i no givim wanpela kliap tok tasol i tok kampani i save skul i bikpela samting na olsem kampani bai wok hat long givim sapot long ol lokal komyuniti long ol sevis olsem helt na edukesen.



Wantok niuspepa i laikim ol eijen insait long Madang, Kimbe, Kundiawa, Wewak, Jiwaka, Tari, Kiunga, Tabubil, Daru, Kerema, Manus, Kavieng na Alotau long salim niuspepa bilong mipela.

Mipela i laikim ol Eijen long distributim niuspepa long dispela ol ples antap hariap tru!

Sapos yu ting yu em rait man o meri long dispela wok, ringim Sekulesen Supavaisor bilong mipela long Fon: **325 2500 o email i kam long: lbents@wantokniuspepa.com**



PIH Saveman *Nius*

"I kam long Pacific International Hospital Port Moresby"

Ph: 311 3000 and 799 88000 Website: www.pihpng.com

Specialist for kidney stones, now in PNG, with special laser treatment

Adding another feather to their cap in introducing modern medical techniques to PNG and living up to their mission of delivering advanced healthcare to PNG; PIH, 3 Mile has successfully arranged for a urology specialist from India, Dr Lionel to visit PNG for a week starting today, the 4th.

Endoscopic removal of kidney stones is a procedure to remove one or more kidney stones using laser lithotripsy – using a laser to break up the stones. The laser is introduced into the body through the urethra in a non-invasive procedure, i.e. no surgery is involved. The greatest advantage in such a procedure is that it is painless (mild discomfort), and greater recovery time.

The conventional methods of stone removal have a lot of drawbacks, including but not limited to more pain, elaborate surgical procedure, increased chances of infection, more bleeding, and longer recovery time.

Kidney (or renal) stones are clusters of tiny crystals that can form in the kidneys. Most clusters are too small to cause any problems and pass out of the body in the urine.

Sometimes, the clusters can clump together to form bigger clusters, which may eventually




Dr Lionel Gnanaraj, Urologist , India

become big enough to block the urine collecting system in the kidney. Sometimes, they pass out of the kidney down the ureter and out in the urine without causing any problems, but if they are big they may block the ureter or lodge in the bladder.

Some kidney stones do not cause any symptoms at all, particularly if they are very small and not causing a blockage. However, kidney stones can be very painful and cause blood in the urine (haematuria) and generally feelings of being unwell, such as a high temperature and vomiting. If the stone passes out of the kidney into the ureter, it can cause severe pain.

Kidney stones can cause an

infection. Signs of an infection include a high temperature, vomiting and/or diarrhoea and urine that is pink or cloudy.



Diagrammatic representation of the procedure

Dr Lionel Ganaraj is a professor and a renowned urologist working in one of the leading medical institution of India; CMC, Vellore. He has extensive experience of more than twenty years in the field of Urology with special expertise in kidney stones removal and transplant of kidneys. He is also highly respected for his pro bono work in under-developed sections of India.

Dr Lionel educated us - "The major symptom of kidney stones can be acute pain, with patients often describing the pain as more painful than even child-birth. Though we also

have cases of silent stones, where the stones form and the patient is unaware till an advanced stage leading to renal failure and the need for use of dialysis."

"In the the constant effort to bring advanced yet affordable healthcare to the country, this time too, PIH has managed to procure the equipment necessary (as an expensive investment) and more importantly a champion in that field to wield them, thus making it a possibility for a lot of people plagued with problems of the urinary tract to get succour, here in PNG itself." , Col Sandeep, CEO of PIH

Dr Lionel plans to visit every 3 months, based on the number of patients requiring his services, however the larger the volume of patients, the more frequently he can fly down, as well as the cheaper the procedure can be priced at. Presently it is priced very competitively at K 7000 only, which is hands-down cheaper than the nearest neighbour offering such treatment.

Dr Paul Alexander, Consultant- Surgeon, a former student of Dr Lionel and a full-time doctor with PIH emphasized on the role of media in raising awareness about such medical advancements in the country that

can benefit all citizens.

PIH is Port Moresby's largest private hospital offering more than 14 specialities under one roof, with specialists and technologically advanced equipment being utilised to bring modern healthcare to PNG. PIH has invited a specialist in Urology from overseas once again to conduct consultations and screening of people facing problems with their urinary tract. Please call at 71558866 to book an appointment. Or, email us at info@pihpng.com for more information.



For more information, please call Sambit K Mohanty | +675 7109 7004 | agm_marketing@pihpng.com

Dr Paul Alexander , Consultant – Surgeon, PIH
Dr Lionel Gnanaraj, Urologist , India



PIH joins you in the fight against Cancer

After the huge success of the Globethon PNG 2016, we would like to honour our promise to help PNG fight cancer by offering an **October Special Cancer Screening Offer**

PAP Smear Test at K 75
Mammograms* at K 170 only

HELPLINE
79988000

Pacific International Hospital : Sec 105, Lot 2, Taurama, 3 Mile, Port Moresby, PNG
PIH Clinic : Ground Level, Vision City Mega Mall, Waigani Drive, Port Moresby, PNG. Ph: 710 02 873
info@pihpng.com | www.pihpng.com | @pihpng | @pihpng

valid till
October 31st

*cost of film is not included in the cost



UNODC autim Ripot bilong Transnesenel Ogenais Kraim long Pasifik.

YUNAITED Nesens Opis bilong Drag na Kraim (UNODC) bin kamapim wanpela ripot long ol bikpela birua we i stap long ol transnesenel kraim long Pasifik rijon.

Ripot i tokaut long 4-pela bikpela kain transnesenel ogenais kraim olsem drag na trafik o stilim ol pipel, stilim ol samting long envairomen olsem piseri na wail laip na pasin bilong stilim ol diwai bilong wokim timba na long stilim na salim ol liklik gan samting.

Ripot i tok lukaut long ol dispela pasin no gut i kamapim bikpela hevi long rijon na i luk olsem ol Pasifik ailan i wok long stap long ai bilong ol ogenais kaim grup. Ol dispela kraim inap long kamapim bagarap long ol komyuniti, sas-tenebel ikonmik developmen na rijonal sekjurit.

I gat planti toksave o ripot em i no stap, na tu planti lain i no gat gutpela save long ol transnesenel kraim i stap insait long ol Pasifik Ailan Kantri i stopim kamap bilong gutpela ripot i gat as.

Long Papua Niugini, ripot i toktok long ol iligel woka long ol ples bilong pilai na entan-tenmen, maining ples na loging kem na pain pamuk bisnis i gro. Ol dispela woka i no kisim gutpela pe long wok bilong ol na i luk olsem ol man i putim hevi long ol i mekim wok wantaim pret.

Sampela kisim dispela kain hevi long wok bikos long ol dinau ol i gat na ol giaman tok promis long ol sampela kain wok. Ripot i tokaut tu long brukim ol human rait na long helt, sefti na lukautim bilong ol wokman na wokmeri.

Hevi bilong ol trabel man i yusim ol gan na ol narapela samting bilong pait long bagarapim ol pipel insait long ol taun bilong Papua Niugini i soim olsem i gat pasin bilong kisim moa gan long ples hait i

Ripot i tok kantri i mas givim tok orait long ol bikpela intanesenel ligel instramen na bihainim tingting bilong ol nesenel lo na long kamapim strong tred sekjurit na bod menesmen.

Gavman bilong Papua Niugini Kriminel Kod (Amenmen) Ekt 2013, we i tok ol pasin bilong stilim ol pipel em i brukim lo aninit long ol intenesenel standet.

Gavman i bin givim ol trening program wantaim teknikal sapot i kam long Intenesenel Ogenaisn bilong Maigresen (IOM), long sakim wok bilong stilim ol pipel na long strongim ol opisa bilong lo, ol fran lain opisa, judiseri na ol lain husat i no wok long gavman.

Kantri i givim tok orait tu long ol narapela bikpela konvensen olsem intenesenel UN Konvensen bilong stopim Transnesenel Ogenais Kraim na Potokol bilong Stopim, Daunim na Mekim Save long ol lain husat i stilim na salim ol Meri na Pikinini.

UN sistem long Papua Niugini wantaim IOM i wok bung wantaim Gavman na ol patna rejensi long strongim wok bilong stilim ol manmeri na haitim ol ausait manmeri husat i laik kam insait long kantri nating na i no bihainim lo bilong kam insait. Dispela ripot nau i stap long websait bilong Yunaitet Nesenes.

Theodist givim K30,000 mani mak dairi buk long ol skul

Paul Zuvani i raitim

BIKNEM stesinari kampani, Theodist, i tokaut long givim inap olsem K30,000 mani mak bilong ol dairi buk i go long ol skul long kantri.

Ol buk bai go long ol skul we i stap long ol bus ples, mausman bilong kampani na biknem PNG swima Ryan Pini i tok long las wik.

Em i tok kampani bai givim dispela ol buk i go long wanpela grup bilong mobail telepon kampani, Digicel Faundesen, long givim aut.

Em i tok Faundesen i wok wantaim ol skul na i save we ol skul i stap.

“Bikos long gutpela wok Faundesen i gat wantaim ol skul long kantri, ol bai givim i go long ol skul we i nidim tru na Theodist i amamas long givim dispela ol buk i go long Faundesen,” Pini i tok.

“Wantaim dispela ol buk mipela i hop dispela bai strongim wok bilong ol skul.

“Ol bai yusim dispela ol buk long rait o long dro na dispela em i gutpela invesmen.”

Long dispela Pini i tok kampani i amamas long givim kain helpim olsem.

Long bekim toktok, Digicel



L-R Sels na Maketing Menesa bilong Theodist, Kevin Anderson, Digicel PNG Faundesen Sif Operesens Opisa, Rita Abe, CEO Beatrice Mahuru na Theodist Koporet Developmenn Menesa, Ryan Pini holim piksa bilong sek mani we Theodist i givim long Digicel PNG Faundesen. Foto: Digicel Faundesen.

Faundesen dairekta Beatrice Mahuru i amamas na i tok tenkyu long kain helpim Theodist i givim long ol.

Em i tok long wok bilong ol, Faundesen i save wok wantaim ol skul long bus ples na inap long nau em i bin helpim olsem 488 skul.

“Wantaim dispela helpim mi ken tok stret olsem long 488 skul mipela i bin helpim i gat inap olsem 19,000 na moa sumtin i stap long dispela

skul,” Mahuru i tok.

“Ol sumatin bai yusim dispela ol dairi buk long mekim wok bilong ol.

“Mipela i amamas long kisim dispela ol buk. Wantaim mani mak bilong K30,000, dispela em bikpela samting.

Mahuru i tok maski nem bilong yia i no wankain long yia ol i yusim ol buk, dispela i liklik samting na kain ol buk em ol spesel na i no gat planti manmeri i save gat dispela ol buk.

Long mak bilong ol manmeri

i save rit na rait, inap olsem 40 pesen tasol i gat save.

Long dispela em i tok dispela ol buk bai helpim long skruim na hap mak bilong ol manmeri i save long rit na rait.

“Mipela long Faundesen i bilip skul wanpela tasol i bikpela samting long helpim stap bilong manmeri.

“Long mipela i bung wantaim biknem stesinari olsem Theodist, mipela i ken mekim senis long kantri,” Mahuru i tok.

2016 TVET prinsipel givim ripot

OL prinsipel bilong Teknikal Vokesenel Edukesen na Trening (TVET) Koles i bin go long harim toktok bilong Dipatmen bilong Edukesen long Waigani stat long Septemba 12 i go long 14 Septemba, 2016.

I bin gat 11-pela prinsipel i kam long ol Teknikal Koles na wanpela institut. Ol dispela skul em;

Pot Mosbi Bisnis Koles, Kokopo Bisnis Koles, Bogenvil Teknikal Koles, Sauten Hailans Teknikal Koles, Goroka Bisnis Koles Madang Teknikal Koles, Pot Mosbi Teknikal Koles, Wes Nu Briten Teknikal Koles, Maunt Hagen Teknikal Koles na Nesenel Ployteknikal institut, Lae.

Het toktok bilong dispela toktok em “Enhancing Quality Skills Development for a Better Tomorrow” we i singaut long Dipatmen bilong Edukesen long stat long wokim plen long kisim bikpela namba bilong ol sumatin husat bai pinis long Gret 8 na Gret 10 na Gret 12 long pinis bilong skul yia.

Plantu sumatin husat i save lusim gret 8, 10, 12 na bikos i no gat inap spes long ol bikpela institusen ol bai stap nating. . TVET sekta bai bungim hevi bi-



Ol prinsipel bilong 11-pela Teknikal Koles na Polyteknik institut wantaim DoE wanwok.

long plantu sumatin i lusim Gret 8,10 na 12 long pinis iblong yia, olsem na em i impoten long DoE long wokim plen bilong go bikpela.

TVET sekta i mas redi long givim inap spes long ol sumatin husat i laik go insait long ol ol Vokesenel Senta, ol Teknikal Koles na ol Polyteknik institusen long ol kain taim bilong ol sumatin i lusim skul,” Dokta Kombra i tok.

Dokta Kombra i tok tu olsem TVET i karikalama i mas senis long em i mas kamapim hai standet na kamap wankain mak long kisim intenesenel luksave.

“Bilong kamapim gut ol plen na ektiviti bilong ol nupela developmen i kamap, ol Prinsipel na ol Dairekta bilong TVET institusen i mas wok gut wantaim long menesim ol institusen gut,” Ekting Seketeri

i tok moa.

Long namba tri de bilong toktok, ol i tok gutbai long tripela bikpela prinsipel husat i save stap long Madang, Wes Nu Briten na Pot Mosbi Teknikal Koles bikos ol i kamap long taim bilong ritaia. Ol dispela prinsipel em, Patrol Maino, ML, Philip Colada na Allan Tira. Ol i bin stap olsem ol TVET leksera na inspekta na bihain kamap prinsipel long ol koles.

Mekim na Save

Luteran nesanel wokmeri konprens i kamap

Paulus Tali i raitim

SAMTING olsem 2,000 Evanjelikel Luteran Sios (ELC/PNG) meri long olgeta distrik i bin stap insait long Nesanel Wokmeri konprens bilong Is Simbu ELCPNG Distrik.

Evanjelisim Dairekta, Reveren Elyamas Bakung, bin autim bikpela tok amamas long lukim planti meri i kamap long dispela bung bilong ol sios wokmeri, na i tokim ol olsem em i bilip ol meri inap mekim senis long wok long ol wan wan distrik ol i kam long en.

Long wainkain taim, Reveren Bakung, i tok em i laik lukim wok bilong Gutnius i kam daun long skeet, peris na kongrikesen level, na ol meri i sanap antap long wok ministri bilong Gutnius.

Em i tok long dispela Konprens namba 15, em i lukim Manus Provins i kamap



Ol Siassi meri husat bai kisim konprens long 2018.

wainkain long Sepik, bhainim wok misin bilong Madang we kaikai bilong wok misin i kamap na em i amamas, Bakung i tok.

Em i tok ol meri i gat moa wok ministri long

autim wok Gutnius i go long ol man meri, long kongrigesen, seket na peris, long tok bilong God i mas go daun long ol bilip man meri i sanap antap long wokabout bilong ministri

bilong Gutnius.

Em i tok tenkyu i go long Cathy Mu long kamapim bikpela konprens olsem, na tu, wok klostu wantaim ol pipel we nau ol i lukim kai kai bilong wok

kamap long Muaina Sekenderi skul we konprens i kamap long en.

Reveren Bakung i tok olsem Dipatmen bilong em i gat ol Dipatmen olsem Sande skul, Mama, Yut, Luteran Laip Care, Komyunikesen, Risos Senta na Evanjelisim long strongim wok misin na sanap strong long moa wok misin i kamap long daunim ol kain hevi long wan wan eria, sosaiti na komyniti..

Singaut i go long ol mama i no ken tingim mani o kago bilong arapela man, tasol long wanem bilip ol i gat long em.

Em i tokim ol long go het na karim wok misin na ol bai lukim kaikai bilong wok ministri.

Em i tok moa olsem ol i no ken mekim wok misin wantaim tu bel long wok we ol wan wan i mekim.

Ol meri Siassi bai hostim mwankain bung long 2018.

Sapta 2
...moa yet long hap 1 (Taro)
KAIKAI BILONG GIVIM STRONG
TARO KONGKONG
Tok i go pas-Long taim bilong tumbuna i no gat taro kongkong long Papua Niugini. Ol man bilong arapela kantri i kisim i kam, ating ol man bilong Hongkong, olsem na nem bilong em i kamap taro kongkong.
Em i wanpela gutpela helpim tru, long wanem, as i save stap longpela taim, winim sampela kris-mas, na i save wok wok long kamapim kaikai.
Taim kaikai bilong em i pinis, bai as na namel i ken kamap kaikai bilong pik. Na bilong man tu, sapos arapela kaikai i sot.
Tok bilong planim
Kisim ol bikpela na strongpela stik tasol na planim. Em i save kamap gut long ples kol, aninit long diwai samting. Olsem na yu ken planim wantaim banana na namel long ol kokonas.
Na tu, yu ken traim planim wantaim pikinini bilong diwai. Taim kaikai bilong taro i pinis, bai yu gat gutpela gaden diwai bilong helpim yu long sampela wok.
Tok bilong planim olpela as bilong taro kongkong
Taim taro kongkong i olpela pinis, orait, yu ken mekim olsem: Wokim baret, kisim longpela namel bilong taro kongkong wantaimlip, slipim long baret na karamapim arere bilong em long graun. Bai kaikai i kamap bhainim dispela olpela namel bilong en.
Taim yu kamautim kaikai pinis, orait, tanim dispela olpela namel na hapsait i go insait long graun.



People connecting People



PNG Air

CENTRAL RESERVATIONS

Phone: + 675 7222 2151 | Fax: + 675 325 4867
TOLL FREE NUMBER 16111 | Email: reservations@pngair.com.pg

NCSL yusim teks mesis long mekim promosen

TEKNOLOJI i wok long senis na maketing dipatmen bilong NAS-FUND Contributors Savings & Loan Society Limited (NCSL) i wok long kamapim ol nupela samting long sevim gut ol memba.

NCSL i lukim dispela nupela sistem bilong salim teks mesis o SMS i kamap wanpela namba wan samting long skelim ol infomesen i go long ol memba na promotim ol seavings na dinau mani prodak.

Tim Lida bilong Maketing na Klaiant Rilesens, Evelove Farapo, i tok planti nupela manmeri i wok long joinim NCSL o kamap memba bilong NCSL.

"Dispela i mekim mipela i kamapim ol nupela we long salim

ol infomesen i go long ol na tokim ol long ol seavings bilong ol na infomesen bilong kisim dinau mani," Mis Farapo i tok.

Em i tok teknologi i wok long senis klostu klostu na dispela i mekim NCSL tu i ran wantaim senis bilong teknologi taim ol i laik mekim ol maketing wok bilong ol.

Mis Farapo i tok NCSL i wok long yusim mobail pon long salim teks mesis i go long ol memba bilong ol na dispela i kamap wanpela gutpela na isipela we long toktok wantaim ol memba.

"Wanpela nupela sistem bilong salim teks mesis ol i kolim 'web-to-sms portal' em i wanpela gutpela we bilong salim tol toksave i go

long ol memba bilong NCSL bikos dispela sistem i save larim planti manmeri i kisim toksave long teks mesis," Mis Farapo it ok.

Mis Farapo i tok planti manmeri husat i memba bilong NCSL i wok long wanbel long dispela nupela a sistem bilong salim mesis i go long planti manmeri long wanpela liklik taim tasol na na larim olgeta i kisim dispel mesis long mobail fon bilong ol.

Mis Farapo i tok givim aut ol infomesen bilong sevim mani na kisim dinau mani em i namba wan samting long ol memba bilong NCSL bikos ol i mas save gut long wanem samting ol i mekim na ol i mas mekim gutpela disisen.

Lending Opisa Stanley Trimoni i tok bihain long ol i bin lonsim dispela nupela sistem bilong maketing, planti ol memba bilong NCSL i bin bihainim 1:1 sistem bilong ol na kisim dinau mani.

"Mipela i gat bilip olsem dispeal nupela sistem bai helpim mipela long salim moa dinau mani. Mipela i lukim planti aplikesen bilong 1:1 dinau mani. Long neks mun mipela i bilip olsem planti memba bai salim aplikesen i kam insait long kisim dispela nupela long prodak o dinau mani, 1:1," Mista Trimoni i tok.

Dispela nupela sistem bilong NCSL long yusim kompyuta long salim teks mesis i go long ol memba bilong NCSL i lukim moa

long 10,000 memba i save kisim ol toksave na arapela infomesen long teks mesis long wan wan mun.

Ol memba bilong NASFUND husat i no memba bilong NCSL yet i mas joinim NCSL na kisim sampela ol gutpela sevis we ol memba bilong NCSL i wok long amamas long yusim.

Ol memba bilong NCSL husat i no save kisim ol teks mesis i kam long NCSL i mas pulumapim SL15 Fom long kisim ol fri infomesen bilong seavings, lon prodak, sevis na arapela ol benefit ol memba i save kisim.

Ol i ken kisim dispela fom long websait bilong NCSL o long ol brens na opis bilong NCSL klostu long ol.

ICCC laikim kompetisen long oil na ges bisnis



Nupela hetopis na kempas bilong ExxonMobil Corp long Woodlands, Texas, Amerika.

WANPELA gavman ejensi i wok long mekim ol wok painimaut long sekim sapos ExxonMobil Corp i bihainim ol lo bilong kamapim kompetisen o resis long baim InterOil Corp.

Independent Consumer na Competition Commission (ICCC) i tok aninit long lo bilong kamapim kompetisen long kantri, dispela plen bilong ExxonMobil long baim InterOil bai no inap kamapim wanpela gutpela kompetisen insait long ol na ges indastri.

Komisina na Sif Eksekutiv Opisa (CEO) bilong ICCC, Paulius Ain, i tok gavman i les long larim wanpela kampani tasol i ranim ol bikpela oil na ges projek insait long kantri.

Mista Ain i autim dispela toktok taim biknem oil na ges kampani bilong Amerika, ExxonMobil, i

laik baim InterOil wantaim ol ges risev bilong em long PRL 15 long Elk-Antelope ges fil long Galp Provins.

"Aninit long lo bilong kamapim kompetisen long kantri, ExxonMobil bai no inap givim sans long arapela kampani insait long oil na ges indastri o bisnis long kamapim kompetisen, tasol em bai kamapim monopoli long oil na ges indastri," Mista Ain i tok.

Monopoli bai kamap sapos wanpela kampani tasol i bosim na ranim bisnis long wanpela sekta o indastri.

Mista Ain i tok long oil na ges indastri na maket long PNG, ICCC i laikim ol arapela kampani long kam insait long kantri na kamapim kompetisen o strongim pasin bilong kirapim kompetisen.

"ExxonMobil i kamap opereta bilong PNG LNG

Projek. Sapos em i baim Elk-Antelope ges fil long InterOil na kamap opereta bilong Papua LNG Projek, dispela bai no inap long kamapim strongpela kompetisen insait long oil na ges indastri long kantri," Mista Ain i tok.

Mista Ain i tok ICCC i les long lukim wanpela kampani tasol i bosim na ranim oil na ges indastri long PNG na kamapim monopoli sistem.

"Mipela i tokim ExxonMobil pinis. Mipela i wok long sekim sapos dispela plen bilong baim InterOil i bihainim Kompetisen Ekt 2002 o no gat," em i tok.

Em i tok ExxonMobil i ken kisim ol loya long stretim dispela toktok na askim ol loya tu long kliarim toktok long sait bilong lo bilong kompetisen.

Pastaim taim Oil Search i bin laik baim InterOil, ICCC i bin mekim wankain

toktok. Oil Search i laik givim US\$2.2 bilien tasol ExxonMobil i givim US\$ 2.5 bilien.

Siaman na Sif Eksekutiv Opisa (CEO) bilong ExxonMobil, Rex Tillerson, i tok ol seaholda na pipel bilong PNG bai kisim benefit o ol gutpela samting taim ExxonMobil i baim InterOil.

Em i tok ol bai pinisim ol pepa wok long baim InterOil wantaim ol aset bilong InterOil long PRL 15 long pinis bilong mun September.

Las wik ol seaholda bilong InterOil i bin bung long wanpela spesel miting long New York City long givim tok orait long bod na menesmen bilong InterOil long salim kampani i go long ExxonMobil.

Long wanpela maket bilong InterOil, Bod Siaman, Chris Finlayson, i tok planti ol seaholda bi-

long InterOil i wanbel long dispela plen bilong salim kampani.

"Moa long 80 pesen seaholda i givim tok orait long salim kampani. Ol i wanbel long dispela plen," Mista Finlayson i tok.

Em i tok InterOil bai kisim laspela tok orait long Suprim Kot bilong Yukon Territory long Kanada bikos InterOil em i kampani bilong Kanada.

Olpele Siaman na CEO, Phil Mulacek, i bin rejistaim InterOil Corp long Yukon Territory.

Mista Mulacek i no wanbel long ol bod i salim InterOil na em i bin kisim ol bod ov dairekta i go long Suprim Kot bilong Yukon tasol em i bin lus long kot.

ExxonMobil bai givim mani long wan wan seaholda na tu larim ol seaholda bilong InterOil i kamap seaholda bilong ExxonMobil.

Sumatin kisim trening long Red Cross

SAMPELA sumatin husat i save stap long Eboni Strit long Hohola long Pot Mosbi i yusim holido o malolo taim bilong ol long lainim na kisim save long First Aid.

Papua New Guinea Red Cross Society aninit long Komuniti Beised Trening i bin givim dispela trening long ol 22 skul sumatin long save long namba wan samting ol i mas mekim sapos ol i bungim ol hevi o birua long laip long ol.

Ol wok manmeri na ol volantia bilong PNGRCS i bin skulim ol dispela 22 skul sumatin long 5-pela de trening long las wik long Pot Mosbi.

Skul level bilong ol dispela 22 sumatin i stap namel long gret 4 na gret 12. Taim ol i pinisim dispela trening, ol i kisim setifiket.

Dispela setifiket bai ekspai bihain long tripela yia.

Wanpela sumatin, Salamo Kavora, i tok dispela trening em i kisim long PNGRCS bai helpim em long sevim ol famili na wan skul bilong em sapos ol i painim hevi, o bungim birua long laip bilong ol.

"Mi amamas long kisim save long helpim ol manmeri long taim bilong imejensi. Sapos bun bilong ol i bruk, ol i kisim posin, o arapela bagarap long laip bilong ol, mi save long helpim ol," Mista Kavora i tok.

"Planti ol sumatin long skul i no save long wanem samting em i First Aid. Sapos wanpela sumatin i ai raun na pundaun o kisim wanpela bagarap long bodi biloong en, planti taim yumi i save kirap no gut na guria, na i no save long mekim wanpela samting long sevim laip bilong em," Mis Kavora it ok.

Em laikim ol skul long lainim ol sumatin long First Aid trening.

Seketeri Jeneral bilong PNGRCS, Philip Tapo, i tok dispela trening bilong First Aid i mas go het yet long arapela ol skul na komuniti long helpim ol manmeri i sevim laip bilong wanpela na narapela taim mol i bungim hevi na birua long laip bilong ol.

Mista Tapo i salensim dispela ol sumatin long mekim ol gutpela samting long laip bilong ol na wanpela we bilong mekim gutpela samting em long yusim dispela trening ol i kisim long First Aid long helpim arapela manmeri o kamap voluntia bilong PNGRCS na yusim dispela save long sevim ol manmeri long taim no gut.

NCDC mas stap klin, helti na seif siti



Gavana Powes Parkop i helpim lida bilong Kanaka Tieta grup long soim ol lain long wanem samting ol pipel i ken mekim long yusim gen ol pipia long gutpela we. Em i aidia bilong tripela 'R'. foto: Nicky Bernard.

Frieda Sila Kana i raitim

GAVANA bilong Nesenel Kepital Distrik Komisen, Powes Parkop i autim gen strongpela tingting na laik bilong em long mekim siti bilong Pot Mosbi i kamap olsem wanpela piksa siti bilong stap klin, helti na seif long olgeta Pasifik.

Mista Parkop i autim tingting bilong em long lukim wanpela helti siti wantaim helti pipel long las wik taim em i bin opim 'Klinim Mosbi kempen' long Lamana Hotel wantaim patnasip bilong Sastenebel Kostlain PNG.

"Mipela laik kamapim wanpela bes siti long Pasifik wantaim 5-pela yia moto bilong yumi olsem, 'Klin, Helti na Seif' siti.

"Mipela long komisen i wokim wok bilong mipela tasol ol pipel i mas rispekim ol narapela," Mista Parkop i tok.

Aninit long Gavana Parkop, insait long las 5-pela yia, NCDC i bin kamapim ol polisi na lo

bilong larim siti i stap klin olsem Buai ben na long klinim Mosbi kempen.

Gavana i tok, ol pipel i mas lukim ol narapela Papua Niugini man na meri olsem ol tu i man na i mas rispekim ol.

"Yumi mas stopim rot bilong sik long kamap pastaim long em i kamap, em i gutpela moa," Gavana Parkop.

Long dispela taim tu, Mista Parkop i askim ol pipel long Mosbi siti long wokabaut ekksesais wantaim em long "Walk for Life" ekksesais we em i save wokim long olgeta Sande moning.

"Bikpela mani tu mas i wok long go long klinim siti. NCDC na olwokman bilong en bai i no inap tru long winim dispela hevi bilong klinim siti. Ol i nidim olgeta pipel long kam insait na wok wantaim. Dispela kempen em bilong ol pipel long siti i mas senisim pasin. Yu mas was long pipia bilong yu yet.

Mista Parkop i tok amamas long Dika Toua,

biknem spot meri bilong apim ol hevi ain na meri husat i kisim wanpela Olimpik gol medal olsem em i stap olsem wanpela sempion na mak bilong senis we ol yangpela inap long bihainim.

"Dika yu em sempion trutru na yu save mekim ol yangpela bilong yumi i gat gutpela tingting." Em i tok.

Yumi laikim siti bilong yumi. Dispela em i ples bilong yumi. Planti lain i save giamanim ol yet na tok ol i bilong narapela hap tasol Pot Mosbi em we yumi stap na wok. Planti bilong yumi i stap laiptaim long hia. Olsem na yumi mas putim han long klinim na lukautim siti Pot Mosbi em i ples tru bilong yumi," Gavana Parkop i tok.

Em i tok, wok bilong klinim siti i stap pinis wantaim ol meri grup long Morata we ol i save kirap olgeta Tunde moning taim na klinim ol hap bilong ol. Em i stap long ol meri long 6-Mail, 5-Mail, 8-Mail, 9-Mail we ol

i wokim wankain.

Gavana i tok olsem ol Wanigela meri long Koki i kirap pinis long klinim hap bilong ol, na NCDC i no baim ol long wokim dispela. Klinim komyuniti em i gutpela bilong bihain sindaun bilong yumi. Yumi mas lusim klinpela ples bilong ol pikinini na tumbuna lain bihain.

"I no gat narapela rot. Olget skol, sios, NGO, ol Motu Koitabu pipel, yumi olgeta i mas kam sapotim "Klinim Mosbi Kempein". Long dispela hap mipela i tok tenkyu long ol sponsa olsem PNG Olimpik komiti, BSP, UPNG, Kananka tieta grup. Nau em i singaut long ol narapela grup na ogenaiesen long rejista wantaim Sastenebel Kostlain PNG.

Sastenebel Kostlain PNG bai givim sapot long we bilong ol samting bilong klinim ples olsem, han klap, rabis bek na tu sapos ol sampela konstraksen kampani inap long givim ol trak bilong ol long tromoi ol pipia em bai gutpela tru.

Meri bikpela samting long famili: Shaligram

Paul Zuvani i raitim

MERI i pos, kona ston bilong famili na famili i mas was gut long em i no ken kisim bagarap, Kenol Sandeep Shaligram, Sif Eksekutiv Opisa (CEO) bilong Pasifik Intenesenel Haus sik (PIH) i tok.

Em i tok taim meri i kisim bagarap i no famil tasol, klen na komyuniti wantaim i save kisim hevi.

Mista Shaligram i mekim dispela tok bihain long awenes globeathon wokabaut, we PIH i bikpela sponsa na i go pas long en long Mosbi las Sande.

Em i tok dispela awenes em bilong tok save long ol meri long ol i mas go long haus sik na sekim bodi bilong ol olgeta taim.

Na sapos ol i gat sik olsem kensa long bel ol i mas kisim helpim hariap.

"Em inap long stretim sik kensa taim em i liklik yet. Taim sik i go bikpela dispela bai hat na planti taim meri i save lusim laip," Shaligram i tok.

"Wokabaut bilong mipela long Sande em bilong toksave long komyuniti, moa long ol meri long ol olgeta taim i sekim bodi bilong ol."

Em i tok narapela as ol i holim



Globeathon wokabaut 2014 - Wantok Fail foto.

globeathon em long tok save long ol bikpela kantri long wol long wok Papua Niugini i mekim na sapos dispela ol kantri i laik helpim, ol i ken givim helpim isi.

Em i tok PIH i gat ol masin long luksave long kensa na sapos ol meri i save ol i gat sik long bodi bilong ol, haus sik i ken hariap long stretim.ol.

I gat wanpela kimoterafi

(chemotherapy) long kantri na dispela i stap long Lae, Morobe provins,

Dispela Shaligram i tok wanpela masin i no inap long stretim sik kensa bilong ol meri long kantri.

Em i tok long olgeta yia inap olsem 1500 meri i save gat sik kensa na i laikim helpim tasol nogat gutpela helpim i save kamap.

PIH i makim Oktoba olsem mun ol bai givim fri sevis long ol meri husat i laik sekim bodi bilong ol long sik kensa.

Long wankain taim PNG Kensa Faundesen Sif Eksekutiv Opisa Dadi Toka Jnr i tok long mekim awenesa long kensa namel long ol meri, faundesen i skulim pinis 600 meri long Nesenel Kapitel Distrik na klostu olsem 2000 meri long

kantri.

Askim long sapos Faundesen i gat tingting long kisim wanpela moa kimoterafi, Toka i tok dispela i stap long wok bilong Gavman bikos olgeta askim i go pinis long Gavman long em i baim wanpela moa.

Em i tok tenkyu long PIH long go pas long globeathon awenes kepen.

Midia tokaut long rot bilong autim Gutnius

Paul Zuvani i raitim

LAS wik Katolik Sios i bin ranim wanpela mida woksop long Don Boskos Teknikol Institut long Pot Mosbi we ol midia i kamap na tokaut long rot bilong autim Gutnius.

Ol midia husat i kamap em Wantok Niuspepa na The National niuspela. Arere long dispela em Matthias Kawage husat i wanpela skalpta na i siaman bilong Bomana sios na wanpela sumatin bilong Holi Spirit Teolojikal Institut, Bomana we ol i kamap na serim wok ek-

spirians bilong ol.

Ol leiman husat i kamap na kisim toktok em ol leiman wok manmeri long ol daioses long Rabaul na Mendi.

Het tok bilong bung em refuji: wanem rot sios i ken yusim midia long tokaut long hevi bilong ol refuji.

Ol refuji em ol lain husat, bikos long hevi long kantri bilong ol, i go stap long narapela ples o kantri.

Tasol tok sios i laik tokaut long em olsem maski ol refuji i stap long narapela kantri, bikpela hevi em olsem raits bi-

long ol long kisim fri sevis i no gat.

Sampela rait olsem fri helt, edukesen, wara na tok tok long raits bilong ol.

Kodineta bilong bung Fr Ambrose Pereira sdb, i tok ol midia i ken tokaut long ol rot we komyuniti o atoriti i ken yusim long helpim ol refuji long hevi bilong ol.

Anna Solomon, husat i bin wok wantaim dispela pepa tasol nau i ritai i tok ol midia ogeaisesen i no mekim inap long kisim stori na tokaut long hevi bilong ol refuji.

Em i tok long save gut long wari na hevi bilong

ol refuji na tokaut long ol, bos man na meri bilong wanwan ol midia oganaisesen i mas salim ol opisa bilong ol i go long ol refuji kem long Manus na Is Awin, Westen provins na kisim stori bilong ol.

Em i tok dispela kain rot i stap tasol ol midia oganaisesen i no yusim.

Tasol em i tok: "Sampela taim hevi bilong fainens i mekim na ol media oganaisesen i no inap long go aut na kisim stori bilong ol refuji."

"Ol midia oganaisesen i save lukluk long sait bilong mekim mani tu. Ol i

laik save wanem stori inap salim pepa.

"Sampela taim bikos long spes, ol midia i no save ranim olgeta toktok we em i mas kamap long em."

Vero Hatutasi i tok *Wantok Niusepa* i gat *The Catholic Reporter* long ranim stori bilong sios.

"Mipela i gat Catholic Reporter we mipela i save ranim ol sios nius long wan wan mun.

"Ol manmeri husat i gat toktok i mas rait na salim i kam long mipela o sapos ol i no inap rait ol i ken go long opis bai mipela i kisim stori bilong ol," em i tok.



Sindaun na harim tok

BIHAIN long indai bilong man bilong em, Alice i go het long wokim bisnis bilong man bilong em.

Em i bisi stret long kamapim strong kampani bilong man bilong em na i kamap gutpela tru. Em i gat planti kastoma na intres em i kisim olgete mun i bikpela tru.

Em i no lukautim bisnis na famili bilong em tasol. Nogat. Olgeta de, em i bisi long lukautim wanpela orphanage, ples bilong ol tarangu pikinini i nogat papa mama moa.

Olsem na wanpela de, wanpela bisnis pren bilong em i pilim sori long em na askim em i go lilimbur liklik long Singapore o long Sydney.

Taim em i harim askim bilong pren bilong em, em i tok: "Sori tru. Bai mi no inap go wantaim yupela. Bikos dispela wik end mi bai go bihainim wanpela ritrit".

Pren bilong em i tokim em: "Kam on Alice! Yu busi olgeta de long lukautim bisnis, famili na ol pikinini i nogat papa mama. Yu mas kisim malolo bai yu kisim strong gen long wok bilong yu".

Alice i tok: "Em i tru. Mi bisi olgeta de. Tasol mi tu laik go malolo long taim bilong ritrit. Mi laik sindaun, sarap na harim wanem samting God i tokim mi.

Long dispela pasin tasol mi save kisim strong bilong God na i mekim mi strong long wokim bisnis, lukautim famili na lukautim ol pikinini i nogat papa mama.

Strong bilong mi i kam long God tasol. Bikos mi gat taim bilong mi long harim em".

Em i tok tru. Sapos yumi sindaun isi na harim Tok, dispela Tok yumi harim i save givim strong na inspairim yumi long mekim wok. i no mak olsem yumi mas sindaun olgeta auwa long harim tok tasol. Nogat.

Yumi tu i mas mekim wok o bihainim wanem samting yumi harim long en na mekim wok.

Ritim Gutnius bilong Santu Luk 10: 36 - 42, em i stori bilong tupela Susa, Meri na Marta. Mi bilip olsem insait long yumi wan wan, i gat dispela pasin bilong Maria - i sindaun long lek bilong Jisas na harim Tok bilong em. Tasol insait long yumi wan wan tu bai gat pasin bilong Marta - bisi long mekim wok long haus kuk.

Tupela pasin em i gutpela. Harim tok na bihain mekim wok. Sapos yumi i sindaun na harim tok tasol, wanem samting bai yumi kaikai? Na sapos yumi mekim wok olgeta taim...yumi baim pilim les na tait.

Olsem na yumi mas sindaun na harim tok olsem Maria, na bihain yumi kirap na mekim wok olsem Martha. Dispela tupela pasin bai strongim laip bilong yumi na bai bringim amamas long laip na wok bilong yumi.



Sios Midia grup long woksop i raun i go long Post Courier long lukim rot we niuspepa i wok long en.



Daunbilo: Bisop Rochus Tata-mai MSC bilong Bereina Daosis na ol narapela long taim bilong woksop. Ol Poto: Pater Ambrose Pereira sdb

Singaut long kamap misineri

SINGAUT i go long yumi wanwan long kamap ol misineri insait long komyuniti na wokples.

Nesanel Dairekta bilong Wok Misin long Vatikan, Rom em Pater Valentine Gryk, SVD i wokim dispela toktok long luksave long dispela mun Oktoba olsem Misin mun.

Katolik Sios long wol bai holim Yukaris selebren long pinisim misin mun long Wol Misin Sande long Sande Oktoba 23.

Long las wik Sande, sios i bin statim Misin mun wantaim pestode bilong Santu Theresa of Child Jesus. Pater Valentine i tok

"selebretim Wol Misin Sande em i bilong yumi olgeta. Yumi kisim singaut long autim Marimari bilong Bikpela long yumi olgeta.

"Ol i salim yumi long autim Gutnius. Olsem sios em i misineri na yumi wanwan wantaim ol gif o presen we Bikman i givim long yumi i kisim singaut long kamap ol misineri long haus bilong yumi, ol komyuniti na wokples.

"Sios i mas go wok wantaim olgeta wantaim pawa na helpim bilong Santu Spiritu long skruim Gutnius i go aut," Pater Valentine i tok.

Ol selebren insait long Lutheran Sios

Paulus Tali i raitim

LAS mun i lukim planti selebren insait long Evanjelikel Lutheran Sios (ELC/PNG) long dispel kantri.

Lutheran Sios em i namba tu bikpela sios insait long dispel kantri bihain long Katolik Sios.

Lutheran Sios i gat moa long wan milien sios memba we plant ii stap long Morobe provins, Momase na Hailans rijon.

Ol Hagen Distrik pasto i bin holim distrik pasto konpres long Mul Seket we moa long 150 pasto na 180 evanjelis i bin bung long toktok, glasim na skelim ol wok long eria bilong ol.

Goroka Taun ELC/PNG



Ol mama na pasto i redi long go insait long lotu na selebren.

Seket tu i bin holim namba tu konpres bilong ol long tripela de long Nesanel Spots institute hap.

Ol yangpela pasto i bin

go pas long lukautim dispel konpres we i bin lukim moa long 100 deleget long tripela peris long taun olsem Sen Mathew long not



Katim kek long selebretim 18 krismas bilong peris. Ol Poto: Paulus Tali

Goroka, Sen Pauls long taun na na Sen Johns long Wes Goroka i kamap long en.

Na Ridima Lutheran peris i bin selebretim

namba 18 aniveseri we moa long 550 Kristen i bin kamap na amamasim de long tingim wokabaut bilong peris insait long 18 krismas.

Skelim wok bilong ol tisa long helpim ol pikinini

LONG dispela wik, olgeta skul long kantri bai selebretim de bilong ol tisa. Em i wanpela bikpela de bilong tok amamas long ol tisa na luksave long bikpela wok tru ol i mekim long skulim ol pikinini bilong yumi. Sampela skul bai holide long taim ol tisa i selebretim dispela de. Sampela pikinini bai givim presen long ol tisa bilong ol.

Long dispela wik tu, Edukesen Seketeri i mekim sampela strongpela toktok long ol tisa i mas mekim gut wok bilong ol. Em i toktok long ol tisa i mas kisim setifiket o diploma long ol skul gavman i luksave long en na bihain ol i ken sanap long klasrum na skulim ol studen.

Seketeri i mekim dispela tok-tok bikos tude i gat planti tisa husat i no mekim gut wok bilong lainim ol pikinini. Sampela bilong ol i no gat laik bilong mekim dispela wok. Ol i laik kisim potnait pe tasol.

Sampela tisa i no pinisim gret 12 na ol go long tisa koles olsem na ol i no inap mekim gut wok bilong ol.

I gat planti hevi i stap, tasol toktok bilong Edukesen Seketeri i mas opim ai bilong yumi. Sapos



Jada 0161

yumi laik ol pikinini i kisim gutpela save long skul, orait i mas gat ol gutpela kwaliti tisa long olskul. I mas gat strongpela het tisa long stiaim gut ol tisa. Na i mas gat gutpela Skul Bot long

sapotim het tisa na kamapim gutpela ples we ol pikinini na tisa bai amamas.

Tude long ol skul long NCD ol tisa i save les long wok. Sampela i wok hap de tasol. Sampela i gat namba tu wok na taim bi-

long ol long klasrum i sot bikos ol i tingim namba tu wok bilong ol. Sampela i save karim loli o bisket i go insait long skul eria na fosim ol pikinini long baim.

Dispela kain ol pasini no inap long kamap sapos i gat gutpela

disaplin na ol tisa i soim stret-pela pasin long ol pikinini. Planti ol pikinini long ol praimer skul i no save olsem ol dispela kain pasin i krangki. Ol i ting em i nomol bikos ol i lukim tisa i mekim.

Sampela tisa i no save raitim ripot kat bilong ol pikinini olsem na papa i no save sapos ol pikinini i skul gut o no gat.

Tasol long ol planti skul i stap longwe long taun, ol tisa i save mekim bikpela hatwok tru long skulim ol pikinini. Maski ol i sot long ol samting na i no kisim pe, ol i wok strong long givim gutpela save i go long ol pikinini. Ol dispela kain tisa i mas gat luksave long edukesen dipatmen. Ol i mekim tru wok maski ol i painim kainkain hevi long sindaun bilong ol.

Long dispela wik yumi ken tok tenkyu long ol tisa long gutpela wok bilong ol. Tasol yumi mas opim maus na toktok strong tu sapos i gat ol slek tisa husat i bagarapim save bilong ol pikinini insait long klasrum. Ol pikinini yet i no inap rausim ol tisa nogut. Yumi ol papamama i ken mekim dispela wok na givim sans long ol pikinini i kisim ol gutpela tisa husat i laik skulim ol pikinini na mekim tru wok bilong givim save long ol.

Mekim samting long helpim kantri

MEKIM samting long helpim kantri moa long kantri i mekim samting long helpim yu'.

Planti manmeri i mas save long dispela hap tok na ol i save long husat i bin mekim'.

Yes, dispela hap tok em bipo presiden bilong Amerika, John F Kennedy i bin mekim long sampela taim long 1960.

Em i tokim ol Amerika manmeri olsem ol i no ken wet long kantri i mekim samting long ol, tasol i kirap na mekim samting long helpim kantri.

Dispela tok ating bai i no min wankain long het tok bilong dispela kolom tasol long sampela we i tokaut long rot ol manmeri long kantri i tingting, stap na mekim ol samting.

Skelim Tingting i yusim dispela tok bilong Presiden Kennedy bikos em i min olsem taim yumi stap, tingting na mekim samting yumi



mas mekim samting long helpim yumi yet tasol long wankain taim, dispela samting i helpim narapela na kantri wantaim.

Em i min taim yumi mekim samting yumi no ken rabisim narapela long yumi bai stap gut.

Nogat. Taim yumi kisim amamas long samting yumi mekim, long wankain taim yumi i mas lukim olsem narapela i kisim helpim na amamas long tok na wok yumi i mekim.

Stap isi, lukluk raun na harim, bai yu harim na lukim kainkain tok na samting.

Planti manmeri bai mekim tingting o tok nogut long bagarapim narapela manmeri, bagarapim samting bilong ol o laik bagarapim ol yet.

Lukim long sait bilong haus yu stap, strit yu stap o pablik ples yu wokabout long em, yu bai lukim kainkain rait na rabis.

Olgeta dispela samting i kamap bikos long kain tingting yumi gat na long pasin yumi gat long en.

Long said bilong graun yumi lukim ol manmeri bilong yumi yet na bilong narapela kantri i kisim graun na kamapim ol haus na wok long laik bilong ol yet.

Ol i no wari sapos ol i bihainim lo o nogat bikpela samting ol i kisim graun na mekim wok olsem haus o bisnis long helpim ol yet.

Long Mosbi mipela i lukim ol manmeri bilong yumi na ausait lain i kisim graun long

ol papagraun na mekim kainkain haus na bisnis.

Dispela i wankain long ol arapela bikpela siti na taun olsem Lae, Mt Hagen, Kokopo, Goroka, Madang na Wewak.

Yumi lukim na haraim ol ausait bisnis lain i kam insait, paulim graun aninit long Spesel Agrikalsa Bisnis Lis (SABL) long kamapim wok didiman tasol dispela i senis na ol katim diwai.

Ol pablik sevan i no wok long bringim sevis i go long ol manmeri tasol i stap long helpim ol ausait manmeri na long helpim ol yet.

Dispela em mi pasin na i daunim kantri bilong yumi.

Olsem long go bek long tok bilong Presiden Kennedy, yumi bihainim na tok yumi mas mekim samting long helpim kantri na i no rabisim narapela bai yumi ken helpim yumi yet.



Published Weekly, Thursday, for Word Publishing Company, Ltd.
P.O. Box 1982, Boroko, NCD
Papua New Guinea

Telephone: (675) 325 2500
Fax: (675) 325 2579

Email: editorial@wantokniuspepa.com

Pe bilong wanpela yia
52 niuspepa

Ples:	Air:
PNG	K220.00
AUSTRALIA	US\$110.00
ASIA PACIFIC na JAPAN	US\$150.00
AMERICA na EUROPE	US\$210.00

General Manager
Elizabeth Konga

Editor
Veronica Hatutasi

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.

Toro



Biabia



Kanage



Luteran nesanel wokmeri konprens i kamap

SAMTING olsem 2,000 Evanjelikal Luteran Sios (ELC/PNG) meri long olgeta distrik i bin stap insait long Nesanel Wokmeri konprens bilong Is Simbu ELC-PNG Distrik.
Evanjelisim Dairekta, Reveren Elyamas Bakung, bin autim bikipela tok amamas long lukim planti meri i kamap long dispela bung bilong ol sios wokmeri, na i tokim ol olsem em i bilip ol meri inap mekim senis long wok long ol wan wan distrik ol i kam long en.

- Paulus Tali i raitim

Delegesen bilong ol Luteran Meri Manus long Wokmeri konprens.

Ol Foto: Paulus Tali



Mi ting olsem...
TEKS... TEKS... TEKS...
Autim Tingting

Teks i kam long 71845906

Dia Wantok Niuspepa, mi lukim wanpela samting i no stret long hia long Otonomes ailan long Bogenvil. Olsem taim gavman i laik helpm yumi tasol yumi wok long bagarapim ken ol sevis ken.

Na tu edita wanpela samting i no stret long ai bilong mi olsem ol COE na Memba long sentral Bogenvil i save pilai politik tumas long ol pipel long ples em i no stret!

Francis na Siromba Kieta

Dia Edita, mi no wanbel tru long Fiji we na ol i kam sekim ol fektori long hia wanem kainkain kaikai PNG kampani i save wokim dispela kantri ya 8 na hap milien pipel bilong dispela kantri i save kaikai na milien pipel bilong Esien kantri olsem Indonesia, Saina, Filipino o Japan. Ol i save laikim PNG prodak na Fiji wanem kain spesol lain na ol i kam sekim fektori long hia? Mi no wanbel long dispela na mi autim long Wantok Niuspepa bilong yumi. Tenkyu.

Wapunk Mosbi NCD

Dia Edita, mi laik autim wari bilong mi olsem, NASFUND KAS-TOMA SEVIS. Mi no amamas long we NPF wokman sevim ol kastoma. Plis menesmen bilong Nasfund i gat ai tingting na filings tu o? Tenkyu...

STORI BILONG TUMBUNA

Rat helpim man

Bipo tru tupela brata i stap. Tupela i stap nau na bik brata i marit pinis, tasol liklik brata i no marit.

Tupela i stap na tupela i gat wanpela gaden. Olsem na wanpela nait bikbrata i go was long pik long gaden bilong ol. Nogut pik i go kaikai ol ya mna mami bilong ol na bik brata i go was long sutim dispela pik.

Taim man ya i go stap long gaden, orait, mama bilong tupela brata i stap long ples. Na i gat wanpela wel Limbun tu i sanap arere long has bilong dispela lapun mama bilong tupela brata ya.

Na dispela wel limbun tu i no bikpela o longpela, nogat. Em i liklik tru na i sotpela tasol. I go tudak nau, lapun mama bilong tupela brata ya i kirap i go antap long dispela wel limbun na wel limbun yet i go longpela tru. Em i go kamap long gaden, long ples we namba wan pikinini bilong em i stap long en.

Nau em i kamap olsem pik na em i kaikai yam na mami long gaden. Em i kaikai i go, i go, i go na i kamap long dispela man, na man

ya i laik sutim dispela pik tasol em i no inap long winim dispela pik. Nogat! Pik i strong na i winim em, na pik i kaikai dispela man.

Pik i kaikai man ya pinis na em i larim het bilong em stap long gaden. Dispela pik i no wel pik tru. Em i mama bilong tupela man ya tasol i tanim olsem pik. Na em i go kaikaim ol dispela kaikai long gaden. Na tu em i kaikai pinis namba wan pikinini bilong em.

Orait, long moning tru em i go antap long dispela wel limbun na em i go bek long haus bilong em long ples. Em i tokim tambu meri bilong em, wantaim namba tu pikinini man bilong em olsem:

Yupela i go long gaden na painim dispela man, nogut pik i kaikaim em. Orait ol i kirap na i go long gaden na ol i go painim em.

Na ol i no painim wanpela man i stap long gaden, tasol ol i go na ol i lukim ples we pik i kaikai long en. Na ol i lukim het bilong dispela man i stap. Na ol i kisim het bilong dispela man na ol i kisim i go planim long ples.

Orait, ol i stap na wanpela taim liklik brata i tok: mi traim i go was long gaden na mi sutim dispela pik. Orait, man ya i kirap na i go long gaden na em i was i stap. Em i stap nau na em i lukim wanpela rat i slip aninit long paiawut. Olsem na man ya i laik kilim dispela rat.

Tasol dispela rat i tokim dispela man olsem. Ah yu i no ken kilim mi. Nogut bai yu dai nau long nait, olsem brata bilong yu. Yu ting brata bilong yu, husat i kilim em. Em mama bilong yutupela tasol i kilim em. Em mama bilong yutupela tasol i kaikaim em. Man ya i harim rat i tokim em olsem, na em i no kilim rat. Yu i go kamautim sampela yam na mami, na bai mitupela kisim i go long ples bilong mi. Klostu bai mama bilong yu i kam nau. Yu mekim hariap na mitupela i go hait kwik.

Orait, man ya i harim tok bilong rat, na i kisim sampela mami na tupela i go long ples bilong rat. Taim tupela i go, rat i go pas na man i go bihain, tupela i go na kamap long as bilong wanpela diwai. Nem bilong dispela diwai

em ton. Nau na rat i otkim man olsem, em nau bai mitupela i go antap long dispela ton em i ples bilong mi hia. Bai mitupela i go antap long dispela rop.

Tasol man i tok, mi prèt long i go antap ya. Mi lukim ol bikpela binatang na mi prèt. Nogut ol binatang i kaikaim mi. Tasol rat i tok, Nogat! Em ol pren bilong mi, ol i no inap kaikaim yu. Olsem man i go antap pastaim na rat i go bihain. Na rat i wok long kisim mami bilong tupela i go antap long diwai.

Nau rat i tokim dispela man olsem: yu tekewe skin bilong mami na kukim i stap na bai mitupela i go sindaun ausait na was long gaden. Klostu bai mama bilong yu i kam nau.

Olsem na tupela i was i stap, i stap na tupela i lukim meri ya em i kam long gaden. Meri i go antap long wel limbun na wel limbun i go longpela tru i go kamap long gaden. Na meri i tanim olsem pik i kam kamap long gaden na em i wok long smelim olgeta hap long gaden.

Bihain em i smelim dispela rot bilong rat wantaim man i go long en.

Em i bihainim i go na i kamap long as bilong diwai ya man wantaim rat i stap long em. Na meri i apim het bilong em i go antap na em i lukim, pikinini bilong em i stap wantaim rat antap long diwai.

Nau man i tok, na bipo yu kaikai brata bilong mi, nau bai yu i dai. Olsem na meri i laik traim long i go antap long diwai long kaikaim pikinini bilong em. Taim em i go antap, ol binatang i wok long kaikaim em nogut tru. Na skin bilong em i solap nabaut. Longpela nait tru ol binatang i mekim save dispela meri. Na meri i no go hariap, nogat. Em i tingting olsem em i laik kaikaim tru pikinini bilong em. Tasol i no gat tru.

Em i mekim i go, i go na i tulait pinis. Long moning meri ya i bek long gaden. Na em i go

antap long wel limbun na em i go bek long haus bilong em long ples.

Long moning yet em i tokim tambu meri bilong em olsem, yupela i go long gaden na lukim dispela man. Nogut pik i kaikaim em. Olsem na meri i kirap kisim ol pikinini blong em na ol i go long gaden.

Na ol i lukim man ya em i wok long kamautim ol yam na mami long gaden. Ol i go i stap long liklik haus, na ol pikinini bilong meri brata bilong man, ol i lukim rat na ol i laik kilim em. Tasol man ya i tokim olsem: yupela i no ken kilim em, tupela i ting, sapos dispela i no gat, em bai mi no inap stap. Nogat tru. Em bai pik i kaikaim mi pinis.

Yupela i ting papa bilong yupela, husat i kaikaim em, em mama bilong mitupela yet i kaikaim em.

Nau ol i lusim dispela rat i stap na liklik papa bilong ol i kisim sampela mami i kam long rat na o putim sampela long ol. Meri bilong brata bilong em i pulimapim kaikai na ol i go long ples. Man ya i tokim rat long i go bek long ples bilong em. Nau ol i go long ples bilong tu.

Taim ol i go kamap long ples, lapun mama i tokim ol olsem. Yupela boilim sampela wara na wasim mi. Na katim skin bilong mi tu. Mi i go daun long brukim paiawut na ol paiawut i pundaun na paitim nabaut skin bilong mi. Na skin bilong mi i solap, na i tok. Em i orait. Tasol ol yet i save pinis olsem. Em i giamanim ol. Nau ol i boilim wara long tupela sospen. Wanpela sospen i no hat tumas tasol narapela sospen i boil krangi tru. Na ol i wasim em long narapela sospen wara i no hat tumas.

Bihain ol i kisim arapela sospen wara i hat tru na ol i kapsaitim antap long lapun mama bilong ol. Na tarangu mama ya i dai pinis. Na ol i kisim em i go na ol i planim em insait long wel arang na bihain ol i brukim paiawut na ol i kukim em na em i paia olgeta.

Misis Magdalene Kumili, SSEC Arkosame – W.S.P

Ansa bilong Wod Pilai isu 2194

PAINIM WOD PILAI

Ol wod lista:

- AFRIKA, ANKA, ARERE, BAGARAPIM, BLANKET, BIKMAN, DOKTABOI, DRAMIM, DRAIWARA, EKSOSPAIP, ENSIN, EMTUPELA, FONDE, FLET, FIKUS, GAVMAN, GOAN, GIAMAN, GREDUET, HEVEN, HARIM, HAMBAMAN, IMIGRESEN, ILEKSEN, KAMAN, KABIS, KLOSTU, LONSIM, LASPELA, MEYA, MANGRO

NGEWFKEEISISEBLLS COHAOOVO
VSPULSXEDELDRTKCEGVSFES
IRDORRZNGJIRQS IPTCIRONPZV
SVSRKQPEFQXAQZTKHARIMGYRL
TTFKNAIFIUOMCSLOGEXLEIROC
TYEPORBEKBBIH E IOWIVANKALQ
JGZTCYAIUHAMBAKMANAECOCJD
EISPOKLOSTUGREDUETS MNLROS
RAZRVTLT EGAAAXDIKKCF AADXE
RHICXOOKSIMIGRESENZRFNNTC
ETHAEGNKASDLDMALTEAHROEHO
HFLETASRWVOAPYIPBWPOIINDP
PERALVINSEKSSOSP AIPXOKEGDM
HLDBRMMAMMTPMGCAKMRNAELTE
DE TENAHFSTAECGRSMAESMSOCY
BNZJSNEFTUBLGDGTANPEARVRA
RHAEBVF EWPOAFDNENGOANE EZF
BKPVREDKYEIAIEARE RETPAEXF
MSAERHRPBL C Q O P L A P O L T E M E P E
VSRENSINIAUSTSSSRKNFSHEGX

ATEEMQDIARWOLR PDKAPS NRWDK
LOXNIIPONFTVIMRWIGNUATDK
WCEOHD MANGROAGIBWGEAVOALP
ZASEDPLPBFIBDGGFGHPCJIIRAX
PNEDRESTAAMIANTYLPTPRSEAI
MRFCWUFELIPES TSUEOZSGLRGO
TOORGFITAVAIADDDENJEVDIDHF
GHIBPEHBOKRWN NPEKSHOMGENW
OOGJTNQQKOAMUTTSNEEIANHDB
DUEUOLZMTN BKITPNERKOCXNQ T
GPSGICSI IAEI MLNLMSSHSETEDH
LRETLIRSMYLI ONOIAADVMLHSFX
SELKEELIICNNP GOANUA SEHOIT
IJSNTRKNANHTMEEDIAASYBYIE
ASDEEUKARAPAIMT MEDKPRSEEH
CSITHSMRLEHPNAHNDTSUOCSFH
EOPMRXIREQAPRSEGGZYSRAISA
IAJEESSNSUINSAYBHQT OFACEUS
HRDJGYDJLARDHYHPDE DOPFDGT
FTEEFREDJRFEAJGYP IQOSEN E



TOK PISIN NEWS

from Radio Australia

radioaustralia.net.au

Harim TOK PISIN long
Radio Australia
101.9FM
Port Moresby

Tok Pisin Service

6am - 7am 6080; 7240(KHZ)

7pm - 9pm 5995; 6020; 9710; 1280(KHZ)

Bogenvil i makim wol kako na soklet

Sam Seke i raitim

KAKAU Festival ol i bin holim long Bogenvil long mun Julai dispela yia i mekim ol kakao fama long atonomas rijon long impruvim o wok long kamapim gutpela kwaliti kakao bilong ol.

Thomas Betitis, em Seke-teri bilong Bogenvil Dipatmen bilong Praimeri Indastris i tok ol fama nau i klinim gut ol kakao gaden bilong ol na i traim long impruvim tu sait long kwaliti.

Em i tok kakao festival we ol i bin holim long Arawa na Buin, i bin soim aut long ol intanesenel spklet ol kain



PNG kakao ol i mekim soklet long en.

kain kakao we ol fama i groim na tu, sait long kwaliti. Mista Betitis i tokaut long

dispela pastaim long Wol Kakao na Soklet de long dispela wik.

Vanuatu na Nu Kaledonia transpot na tred

Sam Seke i raitim

PRAIM Minista Charlot Salwai i tok Vanuatu bai benefit gut moa long sait bilong transpot, tred na sampela samting moa bihainim ol toktok namel long teritorial gavman bilong Nu Kaledonia.

Istar Salwai i tokim ol niuslain long Port Vila we wanpela deligesen bilong Nu Kaledonia gavman tu i stap long em.

Deligesen i bin kamap long Vanuatu long dispella wik Mande we transpot minista i go pas long ol.

Ol bai toktok long sait bilong ea na solwara transpot namel long Vanuatu na Nu



Balus bilong Air Vanuatu.

Kaledonia.

Pablik Rilesens Opisa long Ofis bilong Praim Minista, Hilaire Bule i tok dispela bung bai opim moa rot long sait bilong transpot na ol ples balus namel long tu-

pela kantri.

Em i tok tu olsem ol dispel toktok namel long tupelo kantri bai strongim tu sait bilong siping transpot na tred na ol pasindia i go i kam namel long tupela kantri.

Askim long sainim kwik Pacer-plas- Akedemik i askim

Caroline Tiriman i raitim

WANPELA saveman long ol wok mani long Pasifik i tok ol kantri long rijon i mas askim Australia na New Zealand long dispela tingting bilong sainim dispela Pasifik Agri-men long Closer Economic Relations o "PACER-PLAS" long mun Novemba.

Pala Molisa, em wanpela man bilong Vanuatu na leksera long Victoria Yunivesiti bilong Wellington Skul bilong Akauning na Komesel Lo long Nu Silan i mekim dispela toktok taim planti ol narapela pipel i wok long autim wari bilong ol tu long dispela Pacer-plas.

Sampela lida tu long rijon

olsem Gavana bilong Oro provins long Papua New Guinea, Gary Juffa na Vanuatu bisnisman, John Salong i save tok Pacer-Plas bai helpim tasol Australia na Nu Silan, na ol Pasifik pipel bai lus.

PNG na Fiji tokaut pinis olsem tupela i no laik stap insait long PACER-Plas.

Ni-Van Akademik: Pacer Plus i no nap helpim ol Asples pipel



Toktok agensim Pacerplus wok trade.

Caroline Tiriman i raitim

PASIN bilong toktok hait long dispela wok bung bilong tred namel long Australia, Nu Silan na ol Pasifik Ailan kantri em ol i kolim "PACER PLAS" i no helpim tumas ol asples pipel bilong rijon.

Pala Molisa, husat i wanpela man bilong Vanuatu na

leksera long Victoria Yunivesiti bilong Wellington School bilong Akaun na Komesel Lo long Nu Silan i mekim dispela toktok bihainim wari bilong dispela kain wok bisnis.

Em i tok ol lain i go pas long ol dispela wok i no save givim gutpela tok save i go long ol pipel bilong Pasifik long mining tru bilong dis-

pela wok tred, na wanem ol gutpela samting bai ol i kisim long Pacerplus.

Mista Molisa i sutim tok tu long ol Pasifik lida olsem tingting bilong ol olsem PACER Plus bai gutpela long Pasifik i no stret.

Papua New Guinea na Fiji i tokaut pinis olsem tupela i no laik stap insait long PACER Plus.

Bogenvil Kakao na Soklet bisnis i wok long kamap gut

Sam Seke i raitim

DE Oktoba 1, em i Wol Kakao na Soklet De, na bilong makim dispela de yumi lukluk long sait long kakao na soklet bisnis long Atonomas Rijon bilong Bogenvil, PNG.

Pastaim long Bogenvil

Krais is we i bin stat long 1988, Bogenvil i bin winim ol arapela provins long kantri long kamapim kakao.

Prodaksen i bin go daun long taim bilong krais, tasol Thomas Betitis, Seketeri bilong Bogenmvil Dipatmen bilong Praimeri Indastris i tok prodak-

sen i wok long kamap gen.

Em i tok long dispela yia, ol i ting olsem kakao prodaksen bai go antap long 14 tausen ton hevi.

Mista Betitis i tok 100 pesen long ol kakao fama long Bogenvil em ol famili nau i papa long en.

Solomon Ailan envairomen lo enfosmen yunit

Sam Seke i raitim

SOLOMON Ailan gavman i kamap nau wantaim wanpela Environment Compliance na Enforcement Unit insait long Dipatmen bilong Envairomen na Konsevesen.

Pemanen Seketeri bilong Ministri bilong Envairomen,

Klaimet Senis, Disasta Menesmen na Mitioroloji, Dokta Melchior Matak i tok kantri i nidim dispela yunit long go strongim ol lo long sait bilong envairomen.

Em i tok long nau, ol komplaiens na enfosmen lo long kantri i no strong.

Dokta Matak i tok dispela

Environment Compliance na Enforcement Unit bai wok wantaim polis fos long lukim olsem lo ya i wok.

Long 14 September, Royal Solomon Ailan Polis Fos i bin lonsim wanpela Envairomen hanbuk wantaim envairomen ministri long helpim ol i ranim gut ol envairomen lo.

Wes Papua Warriors Ragbi i win

Caroline Tiriman i raitim

RAGBI tim ol i kolim West Papua Warriors i go bek pinis long PNG wantaim bikipela amamas bihain long ol i bin winim Queensland PNG ragbi lig nains long Brisbane, Australia.

Dispela em narapla gutpela samting em West Papua Warriors i mekim insait long wok ol i wok long mekim long yusim spot bilong ragbi long kamapim awenes long wari bilong humen rait long Wes Papua.

Win bilong ol tu i bin kamap long wan kain taim we 6-pela lida bilong Pasifik, em Solomon Ailan na Vanuatu i bin go pas long en long



Em ol memba bilong Wes Papua Warriors Ragbi tim.

toktok long dispela wari bilong ol Wes Papua pipel long UN Jenerel Asemblil long New York long wik i go pinis. Ol dispela lida i bin askim

UN long painim ol gutpela rot long stopim pasin we Indonesia i wok long mekim long bagarapim ol pipel long Wes Papua.

ExxonMobil mekim bikpela winmani

BIKNEM intanesenel oil na ges kampani bilong Amerika na opereta bilong PNG LNG Projek, ExxonMobil, i tok ol i mekim winmani long namba tu kwata bilong fainensal yia 2016.

Maski prais bilong oil na ges long intanesenel maket i pundaun i kam daun tasol ExxonMobil i mekim klostu long US\$ 1.7 bilien (K5.1 bilien) long namba tu kwata bilong yia 2016.

Dispela mani kam em i US\$0.41 (K1.23) long wan wan sea taim ol skelim dispela wantaim US\$4.2bilien (K12.6) long wankain taim long las yia.

ExxonMobil i tok dispela winmani i no bikpela tumas long winmani ol i mekim las yia bikos prais bilong oil na ges i bin pundaun, ol rifaineri bilong ExxonMobil i no bin kamapim planti prodak tasol ol i bin mekim planti kemikel samting long salim na mekim mani.

"Dispela fainensal risal bi-

long kampani i soim olsem prais biong oil na ges i pundaun tasol ExxonMobil, i lukluk go het long strongim bisnis wantaim ol samting bilong strongim as bilong bisnis, daunim mani mak bilong ranim operesen na kirapim sanmpela ol invesmen o ol projek we mipela i bilip olsem ol i ken bringim moa mani," Siaman na Sif Ekesektiv Opisa (CEO), Rex W. Tillerson, i tok.

"Kampani bilong yumi i save mekim mani long ol bikpela projek na dispela i save kamapim sans bilong mekim bikpela invesmen na strongim invesmen velu bilong ol seaholda bilong kampani," Mista Tillerson it ok.

Long namba tu kwata, mani ExxonMobil i kisim long asprtrim oil na ges projek i sanap olsem US\$294 milien (K882 milien). Prodaksen volium i no senis na is tap yet long 4 milien oil ikuivalen barel long wan de.

Ol prodaksen bilong ges



Hetkwata bilong ExxonMobil long Belgium long Yurop.

long ol nupela LNG projek na arapela ol LNG projek long Canada na Nigeria i helpim ExxonMobil long balensim mani winmani taim prais bilong oil n ages i pundaun.

Mani kampani i kisim long ol kemikel is tap strong yet long mani mak US\$1.2 bilien (K3.6 bilien). Dispela i soim olsem planti kastoma i laikim ol kemikel we ExxonMobil i mekim long oil na ges.

Daunstrim bisnis bilong bilong ExxonMobil i mekim US\$825 milien (K2.475 bilien) maski prais bilong

kain ol samting kampani i save kamapim long dispel bisnis i bin pundaun wantaim prais bilong oil na ges.

Mani bilong yusim long mekim wok bisnis na arapela ol eksplorasen wok i sanap olsem US\$5.2 bilien (K15.6 bilien) na dispela i lukim kampani i daunim mani mak bilong mekim wok i kam daun long 38 pesen.

Long dispela namba tu kwata ExxonMobil i skelim US\$3.1 bilien (K9.3 bilien) olsem dividen o winmani long ol wan wan seaholda bilong kampani.

Duma tok tenkyu long polis

MINISTA bilong Pablik Entaprais na Stet Invesmen, William Duma, i joinim Kumul Consolidated Holdings (KCH) na arapela ol Stet On Entaprais (SOEs) long tok tenkyu long gutpela wok polis i save mekim long PNG.

Minista Duma i tok tenkyu long gutpela wok ol polis manmeri i save mekim long larim komyuniti i stap seif wantaim gutpela pasin na riskpek long lo na oda.

Em i autim amamas bilong em taim em i makim maus bilong Prais Minista Peter O'Neill na givim wanpela K500,000 sek amni long helpim ol polis manmeri bilong PNG i go long XVI Australasia Polis na Imejensi Sevis (AP&ES) Gem.

KCH wantaim ol SOEs i givim dispela mani long polis long baim ol samting bilong opis olsem kompyuta, failing kabinet, teibol na sia we planti ol polis stesen i nidim long mekim wok bilong sevim komyuniti.

Antap long dispela, ol polisman bai nidim mani bilong baim hotel, kaikai, balus tiket, na ol yunifom long dispela bung bilong ol polisman long AP&ES Gem long Australia.

Mista Duma i tok: "Dispela AP&ES Gem em i gem bilong ol Supahiro. Polis manmeri bilong yumi long PNG em ol Supahiro biong yumi bikos olgeta de sapos wanpela trabel o hevi i kamap, ol polis manmeri i save stap pas long stretim na stopim kain ol hevi."

Long makim maus bilong Prais Minista Peter O'Neill na Nesenel Gavman, Mista

Duma i tok: "Mi laik yusim dispela sans long tok tenkyu long gutpela wok ol polis manmeri bilong yumi long kantri i save mekim long larim ol komyuniti bilong yum i stap seif na stap."

Mista Duma i tok dispela polis manmeri husat bai go long dispela gem i mas yusim dispela sans long mekim moa trening taim ol i redi long kamapim gutpela sekyuriti long bikpela bung bilong APEC Summit long yia 2018.

"Mipela i laikim olsem ol sevis PNG bai givim long dispela APEC bung i mas kamap gut. Planti salens i stap tasol mipela i bilip olsem ol polis manmeri bai helpim mipela long rausim sampela ol salens long sait bilong sekyuriti na sefti," Mista Duma i tok.

Mista Duma i tok tenkyu long KCH wantaim ol SOE i sapatim ol polis manmeri long makim kantri a go long dispela gem.

"Ol SOE bilong yumi i wok long givim helpim long ol manmeri. Ol i save helpim ol komyuniti. Planti dispela kain helpim i save kamap tasol em i no save kamap ples klia.

"2015 Pasifik Gem i no nap long kamap sapos ol SOE bilong yumi i no bin sapatim. Nau ol SOE bilong yumi i kam insait long sapatim ol Supahiro bilong yumi, ol polis manmeri bilong yumi taim ol i laik long long Australia long dispela gem."

PNG polis bai salim 150 polis manmeri i go long dispela AP&ES Gem Sunshine Coast long Queensland, Australia we bai kamap long 8-15 Oktoba, 2016.

O'Neill: Turis bisnis bai stap yet

PRAIM Minista, Peter O'Neill, i tok oil na ges bai pinis tasol bisnis bilong turis bai stap yet.

Mista O'Neill i givim dispela toktok long las wik taim em i opim wanpela nupela haus bilong Madang Resort Hotel.

"Kantri i wok long lukim planti projek long oil, ges na maining. Em i gutpela tasol ol dspela kain projek bai pinis.

"Bisnis long maining na petrolium bisnis bai no inap stap longpela taim. Taim oil na ges i pinis, taim gol na kopa i pinis, projek bai pas. Maining bai pas.

"Gavman na kantri bai no moa kisim mani long oil, ges

na maining projek tasol ol dispela risos i pinis.

"Tasol taim yumi tok long bisnis bilong turis, em bai stap yet. Ol pikinini bilong yumi long bihain taim bai kisim planti gutpela samting long turis bisnis.

"Kantri bai kisim moa benefit. Gavman bai kisim mani long ranim kantri long turis bisnis taim oil na ges i pinis.

"Planti taim yumi wok long toktok moa long LNG na lus tingting long turis bisnis.

"Gavman nau i laik kirapim turis bisnis. Mipela i makim 5-pela ples insait long kantri olsem turisim provins.

"Em ol Milen Be, Madang,



Ol turis i kam long bikpela krus sip long Alotau, Milen Be Provins

Is Nu Briten, Nu Ailan na Maun Hagen. Bai yumi kamapim strongpela patnasip wantaim ol opreta bilong hotel, ges haus, tua kampani, na arapela ol man-

meri husat i mekim turis bisnis long ol dispela provins, na tu long ol arapela provins ong kantri bilong yumi," Mista O'Neill i tok.

Manus seavings memba bai kisim intres

OL memba bilong Manus Savings na Loan Society (MSLS) bai kisim intres o winmani long mun Disemba long dispela yia bihain long ol i putim wanpela nupela kompyuta softwe o program bilong mekim ol benking sevis.

Dispela bai kamap namba wan taim long ol manmeri husat i gat akaun long MSLS long kisim intres antap long seavings bilong ol.

Gavman bilong Australia i givim dispela nupela benk program o kompyuta program long Manus Provinsal Gavman aninit long wanpela patnasip long givim sevis bilong benking na fainens long planti ol manmeri i stap long

ruel eria.

Klostu long 8, 000 manmeri long Manus, husat i memba bilong MSLS, i lukim seavings bilong ol i gro i go antap bihain long ol i kisim dispela nupela benking sistem program.

MSLS i gat 5, 000 faiensal memba, husat i manmeri long ples. Ol i save bungim mani bilong ol na sevim long viles akaun bilong ol.

Klostu long 3, 000 memba em ol i gat wan wan seavings akaun bilong ol.

Ol rekot bilong benki i soim olsem 5-pela mun pas-taim long ol i yusim dispela nupela kompyuta program, wok i no save kamap gut.

Dispela nupela benking sistem i helpim MSLS i peim K40 intres long wan wan akaun bilong ol memba.

Taim ol i bin statim MSLS, dispela em i namba wan taim MSLS i peim dispela kain intres mani long ol memba.

Long bihain taim, ol bai lukim hamas pesen ol memba i putim mani insait na bihainim pesen long skelim intres mani long ol memba.

Siaman bilong MSLS, Ben Pondrein, i tok dispela nupela softwe i helpim ol na daunim level bilong mekim sampela liklik asua, na tu ol memba i painim isi long yusim dispela nupela sistem

long putim mani i go insait long benki.

"Long namba wan taim, mipela i gat dispela nupela sistem long larim wok long kamap isi, na tu long larim ol manmeri long ples i sevim mani," em i tok.

Mista Pondrein i tok dispela nupela benking sistem bai helpim MSLS long givim dinau mani long ol liklik bisnis na promotim ol liklik bisnis long Manus long bihain taim.

Manus Provinsal Gavman i bin statim dispela 'Village Finance skim' long yia 2010. Nau dispela i gat 94 akaun bilong ol liklik manmeri long ples na dispela viles akaun i



Wokmeri bilong Manus Savings na Loans Society, Dalsy Pondrai, i sevim wanpela memba long kaunta.

holim klostu long K307, 000.

Dispela patnasip namel long Manus Provinsal Gavman na Gavman bilong Australia i lukluk long sapatim iekonomik developmen long

Manus.

Dispela patnasip bai kirapim bisnis trening na fainseal literasi program long senisim laip bilong ol manmeri Manus.

TUPELA moa skul long Hailans rijon i kirapim nupela dabol klasrum wantaim fanding bilong Digicel PNG Faundesen long mani mak bilong K480,000.

Map Praimeri Skul long Mendi Munhiu Distrik, Sauten Hailans provins na Tondomong long Mul Baiyer, Westen Hailans Provins i bin kisim ol dabol klasrum long Digicel Foundation.

Faundesen Sif Eksekutiv Opisa, Beatrice Mahuru i tok olsem edukesen em i namba wan samting long senis bai kamap. Em i save muvim sosol na ikononik developmen.

“Wanpela bilong ol 5-pela bikpela tingting bilong Digicel PNG Faundesen em long mekim edukesen i kamap isi long ol liklik pikinini long kantri. Ol pikinini i save stap

longpela taim bilong ol insait long klasrum. Em i wanpela hap we ol i save kamapim ol driman bilong ol long kamap bikpela manmeri long wol. Olgeta taim mipela i givim mani long wokim klasrum em mipela i save givim sans long 80 moa skul sumatin long tingting long kamapim ol bikpela samting na me long bihain taim,” Mis. Mahuru i tok.

Map Praimeri skul dabo klasrum, i bin kisim K240,000 long wokim wantaim ain na wanpela opis bilong tisa long namel, 40 des bilong 80 sumatin, des na sia bilong tisa, sola lait, 9000 lita wara tenk na tupela VIP toilet na tupela baket sawa bilong waswas bilong ol meri sumatin long waswas.

Long taim bilong opim klasrum Memba bilong Mendi, De Kewanu i bin i stap long tok

Hailans skul kisim nupela klasrum



Map praimeri skul sumatin i go pas long ol deliget bilong Digicel i go long nupela dabol klasrum.

tenkyu long Digicel olsem wanpela gutpela piksa koporet sitisen long PNG.

Mista Kenawu i tok tenkyu long invesmen bilong Digicel long ilektoret bilong em na em i tok strong long ol pipel bilong em long ol i mas lukautim ol dispela klasrum.

Insait long Sauten na Westen Hailans tasol, Digicel PNG Faundesen i putim pinis ol invesmen long mani

mak bilong K4.9million long ol kainkain edukesen na helt projek. Tondomong Praimeri na Map Praimeri em bringim namba bilong ol skul we Digicel PNG Faundesen i helpim pinis, i go antap long 31 olgeta.

Stat long yia 2008 Digicel PNG Faundesen i wokim planti developmen long ol rurel na ol setelmen long siti na tromoi pinis mani mak bilong K55 milien insait long olgeta 22 provins long senisim laip bilong hap milien pipel.

Rop koniak bilong Madang kamapim ‘kava’ long Fiji

James G. Kila i raitim

KONIAK o kava bilong Madang provins nau i stap insait long paket na wanpela kampani bilong Fiji i save salim na promotim.

Dispela kampani i bin tokaut long dispela taim em i promotim prodak bilong en long Madang las mun long Madang Invesmen Samit long Sugeng Aben pak bilong Madang Risot Hotel.

Kava o ‘koniak’ we ol pipel bilong PNG na arapela Pasifik ailan save dring nau i stap long paket na wanpela kampani bilong Fiji i promotim aninit long nem “Kava Toks”

Dispela kampani bilong Fiji i bin bringim ol prodak bilong en em ol i wokim wantaim ol ruts o rop bilong kava em ol i kisim long Madang na karim i go long Suva, Fiji na wokim.

Selsman bilong Fiji kampani i tokaut olsem wanpela ejent bilong ol i bin raun baim ol rop bilong kava plent long not kos rot (NCR) long Sumkar distrik na ol i bin pekim na salim i go long Mosbi na bihain go long Fiji. Long Fiji, ol wokman i wokim gut long fektori na kamapim ol kain kain marasin.

Selsman ya i bin soim prodak ol i wokim long Madang koniak long Madang Provinsal Dipatmen ov Agrikalsa na Laipstok ekstensen opisa, Paul Hubub long promosen stol bilong ol long Madang Invesmen Samit.

Dispela kampani bilong Fiji i bringim ol kava ol lain ejent bilong en i baim na salim i go long wokim ol kain kain prodak long Fiji. Sampela long ol dispela prodak em ol i putim long paket olsem

das o paura, em bihain ol kastoma i ken putim wara na miksim na dring. Nara-pela prodak em olsem loli tasol we ol i putim long liklik paket.

Kava o koniak em biknem dring insait long westen Pasifik rijon. Dispela nem ‘kava’ em nem i kam long Tonga tokples, ol lain Samoa i save kolim ‘awa’ na ol lain long Fiji save kolim ‘yaqona’ na ol pipel long Vanuatu save kolim ‘malok’.

Ol ruts o rop bilong kava taim rausim long graun i save kamapim wanpela dring we i ken mekim yu spak liklik tasol em no inap bagarapim tingting bilong man. Em bai givim naispela malolo na tu em gat marasin long rausim sampela ol sik long bodi olsem sotwin, skin pen na arapela sik long bodi we medikol stadi i soim pinis.

Koniak o kava em spesel dring long tumbuna taim yet insait long Melanesian kalsa na tu ol arapela kantri long Polynesia, Micronesia na tu long sampela hap long noten Australia.

Bipo long tumbuna taim, ol lain save redim kava long kain kain rot long laik bilong ol yet. Sampela ol save kaikaim long tit na memeim, sampela save sigirapim na paitim ruts antap long ston long kisim wara o spet bilong en. Dispela wara bilong ruts bilong koniak em save bringim kamap samting olsem spet we ol i save putim wara wantaim na dring.

Mista Hubub bilong Madang DAL, ol rurel famas long PNG i ken groim dispela krop na lukautim gut na salim bikos i gat maket bilong en i stap. Tasol salens nau i stap long bringim ol saveman tru long redim gut ol koniak na baim long ol famas.

WHITE TUNA FLAKES
DIANA White

WHITE TUNA insait K 2.20

DIANA Barbecue Flavour

Tasty and Flavourful White Tuna for Everyone!

Manufactured by: **RD Tuna Cannery Ltd.**



Madang provinsal DAL ekstensin opisa, Paul Hubub i skelim paket bilong kava Fiji kampani i wokim wantaim koniak ol i baim long Madang na karim i go. Poto: James G. Kila

Shimon Peres, Namba 6 Isreli Presiden i dai pinis

SHIMON Peres, pastaim presiden bilong Isrel na wanpela bilong ol man i kirapim nesen bilong Isrel na banisim kantri long ol birua stap raun long en long Midel Is na man bilong strongim pasin bilong bel isi long Midel Is i dai long dispela wik, na em i gat 93 krismas olgeta.



Shimon Peres i toktok long ol memba bilong Foren Pres Asosiesen long taim em i bin lukluk raun long wanpela taun bilong Israel, Sderot, long 2014.

Peres i bin go insait long wanpela eria haus sik long Tel Aviv-long Septemba. 13, 2016, bihain long em i kisim hat atek o strok. Em i dai long Sheba Medikal Senta long las wik Trinde moning. Ol famili wantaim meri bilong em i bin stap wantaim em taim em i lusim laip.

Peres i bin holim wok long olgeta bikpela posisen insait long Isrel gavman moa long 60 yia wok laip bilong em. Em i bin kisim ol samting bilong pait long bikpela pait bilong stet bilong Isrel long 1948 Woa bilong kisim Independens na long kamapim ol nuklia riekta long 1950.

Em i kisim wanpela luk-save bilong man bilong bringim bel isi, Nobel Pis Prais bikos long bikpela wok em i mekim long kamapim bel isi wantiam ol Palestain long yai 1993, na em i bin kamapim planti nupela samting long kantri bilong em insait long politik na diplometik laip bilong kantri.

“Wasman bilong Isrel i no save slip na em i no save ai slip,” em i tok bilong wanpela opisa bilong em pastaim, Mitchell Barak, i kolim hap tok long Buk Song we i makim piksa bilong dispela bikpela lida bilong Isrel.

“Maskim em i kisim krismas 90 yia, Peres i wok yet long traim long tingim wanem samting bai Isrel i mekim long stap gut long bihain taim,” Mitchell i tok.

Sampela taim bihain em i kamapim nem bilong em yet olsem pisin, balus, tasol long ol namba wan yia bilong kantri, ol i save kolim Peres olsem wanpela ol bikpela taragau pisin bilong Leba Pati long pawa,” wanpela senia man bilong Institut bilong Palestin Stadi long Amman, Jodan i tok.

Peres i bin lukim setelmen bilong ol Juda long graun we Isrel i bin winim long 1967 olsem wanpela wok bilong kamapim strongpela banis long stopim ol birua na long kamap bun baksait bilong developmen bilong ol.

Insait long olget yia em i wok, tingting bilong em i senis. Wantaim pastaim Prais Minista, Yitzhak Rabin

na Palestinian lida Yasser Arafat, em i bin kamapim bikpela samting long histori bilong Isrel long 1993 em Oslo Akod, we long dispela taim ol i bin lukim olsem Palestin olsem wanpela kantri.

Ol tripela man ya i winim 1994 Nobel Pis Prais long wok bilong ol, na Peres i tokaut long wol olsem em i kamap bilong nupela Midel Is bihain long ol tripela i bin sekhan long wanbel long dispela long Nu York, USA.

Visen bilong long wok wantaim pis o bel isi na i no long pait i stap long tupela hap wantaim. Planti Isrel pipel i no wanbel wantaim em long givim sampela hap graun i go long ol Palenstin pipel na ol i kamapim protes pasin we i bin kamapim dai bilong Prais Minista Rabin long 1995 long han bilong Yigal Amir.

Peres i kirap kisim wok bilong Rabin, tasol 6-spela mun bihain long ileksen em i lus na Benjamin Netanyahu i kisim sia.

I kam long pinis bilong ol yia bilong 2000, ol wok bilong kamapim bel isi namel long Isrel na Palestin i pundaun taim ol Palestin i kirap gen na pait long Isrel.

“Planti pipel i tok mi bin mekim rong long toktok long kamapim nupela Midel Is na kamapim moa wok bung wantaim ol wantok long Arab,” em i bin tok tok long Boomborg long 2012. Mi ‘no rong’, tasol em i wok long kisim longpela taim liklik,” Peres i tok.

Nem tru bilong en, Szymon Perski na mama i bin karim em long Ogas 2, 1923, long Wiszniew, Poland (nau em i hap bilong Belarus), na bihain em i go wantaim famili bilong en long hap bilong Palestin long taim em i bin stap aninit long Briten long 1934.

Bihain long em i go long wanpela egrikalsa boding skul, em i go stap long egrikalsa Kibbutz Alumot klostu long Solwara Galilee,

we em i kisim wok olsem wanpela deiri fama na wasman bilong sipsip inap long taim em i bin go insait long Haganah, wanpela hait grup bilong Isrel Difens Fos.

Taim krismas bilong em i stap namel long 20 na 30 yia, em i bin kisim ai bilong namba wan Prais Minista, bilong Isrel, David Ben-Gurion, husat i bin givim em wok long baim ol gan na ol samting bilong pait, long ol narapela kantri pastaim long 1948 woa.

BBC nius rida i kraik long stori bilong bebi



Abu Kifah i tokim ol ripota, "God i helpim mipela long sevim dispela bebi."

OL pipel husat i lukim piksa bilong liklik bebi ol i bin painim insait haus long Aleppo i bin amamas na sampela i kraik. Dispela bebi i gat wanpela mun, tasol olgeta famili bilong em i bin dai long taim ol bom i bagarapim haus bilong ol.

Wanpela kamera man i bin kisim piksa long taim Abu Kifah i bin painim dispela bebi. Kifah i bin kraik nogut tru. Em i tok em i tingim pikinini bilong em long taim em i lukim dispela bebi.

Das i bin karamapim dispela bebi tasol em i orait. Embuens i karim em i go long haus sik i stap klostu long dispela hap. Dispela liklik bebi i bin laki. Haus bilong famili bilong em long Idlib, 40 mail saut wes long Aleppo, i bin kisim bikpela bagarap long taim ol balus bilong Rasia husat isapotim gavman bilong Syria bin bomim. Planti tausen manmeri i bin dai.

Kifah i wanpela wokman bilong ol lain White Helmet, husat i save helpim ol lain i kisim bagarap. Em i wok long sekap long ol haus i go na em i painim dispela liklik bebi.

Wara i kapsait long ai bilong em long taim em i holim pas dispela bebi na em i tok, “God i helpim mipela long painim dispela

Ol pikinini go bek skul tasol bom i pundaun yet



Ol skul pikinini long Aleppo i sanap aninit long sain i tok 'sanap yet.'



Ol pikinini sanap namel long ol haus bom i bagarapim long Jarabulus distrik, Aleppo.

GAVMAN bilong Syria wantaim pren bilong en Rasia i wok long bomim gen Aleppo long Sande, tasol ol skul pikinini long Isten distrik i statim nupela skul yia long Sande.

Moa bom i pundaun na strongpela pait i kamap namel long oposisen na ol soldia husat i sapotim Presiden Bashar al-Assad. Ami bilong Assad i tok bai ol i no inap kilim ol rebel paitman na Rasia bai stop long dropim bom, sapos ol rebel i givap long pait na givim ol samting bilong pait.

Planti handet manmeri i dai na moa long 1,000 i kisim bagarap long wanpela wik taim ol balus bilong Syria na Rasia i dropim ol strongpela bom long mekim ol rebel i stopim pait.

“Mipela invaitim ol lain i wok long pait long lusim Isten Distrik bilong Alepona lusim ol sivilien populesen long stap ol yet,” militeri komand i bin tok long wanpela pas. Pas i tok gavman bilong Syria na Rasia i promis long larim ol i go fri.

Tasol planti lain i no bilip dispela promis bai i kamap tru. Las mun, ol US i toktok wantaim Rasia long stopim pait, tasol wan wik bihain pait i kamap gen long taim ol jet balus bilong Rasia na Syria i dropim bom long ol trak i karim kaikai na ol arapela saplai long helpim ol pipel insait long Aleppo.

Ol pipel bilong Aleppo i tok ol bom i wok long pundaun

long Sande. Sampela tisa i salim poto bilong ol pikinini i skul tasol ol i tok i no planti pikinini i kamap long skul.

Ol skul long Isten hap bilong Aleppo i bin op long Sarere tasol wan wan tasol i bin gat klas. Ol pipel i tok ol strongpela bom ol i kolim klasta bom inap long bagarapim ol skul i stap daunbilo long graun.

Ol skul haus long Ma'adi distrik long Isten Aleppo i pas bihain long bom i pundaun long ol. Wanpela ektivis i tok, “Wanpela gutpela samting mi lukim long 40 de nau em ol pikinini i karim skul beg na wokabaut i go long skul.”

Wissam Zarka, wanpela tisa i tok ol studen bilong em i bin stap bek long skul long Sande bikos ol balus i wok long flai raun long dispela eria.

Ol dokta i tok lain bilong Presiden Assad i bin paia long tupela haus sik, M1 na M2, ol i no givim nem bilong ples nogut ol birua i bagarapim. Long Sarere ol helikopta bilong Syria bomim M10 haus sik na long wik, ol i bagarapim tupela arapela imejensi senta. Ol bom i bagarapim wanpela haus sik bilong ol mama i karim.

Sapos Presiden Assad i kisim bek Aleppo, bai em i kontrolim bikpela populesen bilong ol siti na subim ol rebel paitmen i go long ol ruel ples long Syria. Ol ausait lain i wok long sapotim em long pait long kisim bek Aleppo.



Fred Hollows givim fri sevis long sekim ai long Ramu NiCo

RAMU NiCo Menesmen (MCC) i amamas long wok poroman wantaim wanpela praivet o non-gavmen ogenaiesin long Madang ol i kolim Fred Hollows Foundation PNG long sekim ai bilong ol wokman na ol manmeri i stap long projek eria bilong en.

Dispela wok poroman namel long tupela bai givim sans tu long ol lokal papagraun long arere long Kurumbukari Main na Basamuk Rifaineri tu long sekim ai bilong ol na kisim toksave long baim glas o sekim sapos ai bilong ol em orait.

Dispela program bilong sekim ai bai kamap long pinis bilong dispela mun bihain long program na toksave i go aut long tupela wok sait bilong Ramu NiCo long KBK main na Basamuk Rifaineri.

Long las wik Fraide, Septemba 30, wanpela tim bilong Fred Hollows Foundation PNG, i bin go stap long Ramu NiCo Madang Opere-sen Bes long sekim ai bilong ol wokman meri. Sampela wokman meri bilong ol kontrak kampani olsem Raibus Enjiniaring Limited (REL) tu i bin kamap long sekim ai bilong ol. Sampela ol lenona kampani menesmen lain olsem siaman bilong Raibus Limited, Steven Saud, deputi siaman Moses Kumura na jeneral menesa bilong Raibus Sekuriti Sevis, Mathew Denguo i bin gat sans long sekim ai bilong ol tu long dispela taim.

As tingting bilong dispela wok

poroman o patnasp em long luksave olsem ol wok manmeri bilong Ramu NiCo Projek na ol papagraun klostu long KBK Main na long Basamuk Rifaineri i mas gat gutpela ai long wok wantaim na dispela fri sevis bai helpim ol gut.

Fred Hollows Foundation i bin raitim wanpela leta long kisim tok-orait long Ramu NiCo (MCC) long karimaut autris o patnasp wok wantaim ol long bringim sevis bilong ol i goaut long komyuniti. Dispela wok bung i karim kaikai taim Vais Presiden bilong Kampani, Wang Baowen i givim tok-orait na i givim wok long Koporet Ofis long helpim long kamapim dispel wantaim helpim bilong tupela medikal opisa long wok sait.

Long Septemba 26, diputi rupir-tendent bilong Ramu NiCo public rilesins, Mathew Yakai aninit long Koporet Ofis i bin bung wantaim Fred Hollows Foundation Progrem Menesa long Madang, Mista Nicholas Gan na ol i redim program long go long tupela wok sait. Ol i pasim tok olsem autris o wok bai kamap pastaim long Kurumbukari long Oktoba 24 na wanpela wik bihain em bai kamap long Basamuk, em deit bai ol i stretim bihain.

Ol wokman meri long Madang i bin kisim namba wan sevis long las wik Fraid, em long sekim ai bilong ol wokman meri na tu givim ol glas we praisem liklik na tu ol i gat

bikpela hevi long ai em ol raitim kad long ol bai go opiresin.

"Dispela kain sevis em I gutpela bilong Ramu NiCo na mipela I laik wok bung wantaim long kamapim gutpela na seif wok ples bilong ol wok lain bilong kampani,"

"Ananit long Ramu NiCo Helt, Sefti na Envairomen i gat luksave olsem olgeta wok man meri lmas gat gutpela helt na ol i mas gat gutpela ai long lukim wok na i mas wok seif," Mista Mathew Yakai i tok.

Fred Hollows em wanpela non-gavman ogenaiesen husat nau i stap wok patna wantaim Modilon Jeneral Haus Sik long Madang bihain long ogenaiesen i bin kamap long 2008. Ol i save mekim wok bilong ol long Madang na long PNG na bikpela wok bilong ol em long banisim ol sik we i ken kamapim aipas, na tu ol i save stretim ol liklik bagarap i kamap long ai bilong ol manmeri.

Fred Hollows i surukim gutpela wok em wanpela spesel man bilong kantri New Zealand, Profesa Fred Hollows i bin kamapim. Mama i karim Fred long yia 1929 na em i dai long 1993. Fred em biknem dokta bilong ai na em save toktok strong tu long sosel jastis na sanap strong long raits bilong ol pipel long ol mas gat gutpela ai long lukluk.

Fred Hollows Foundation i kamap long Sydney, Australia long September 3, 1992, 5-pela mun

pastaim long Profesa Fred Hollows i bin dai.

Fred Hollows Foundation i gat visin o lukluk olsem nogat wanpela

man o meri i bai stap ai nogut na em save wok long stretim ol hevi long ai bilong ol pipel long hap bilong Asia, Afrika na Pasifik rijon.



HEO bilong Fred Hollows Foundation Sylvia Wenzel soim ol leta long traime ai bilong ol lain.




Onie Toluvaaba i traime skelim ai bilong em stap.



Fred Hollows Foundation PNG wokmeri Sylvia Welzel i sekim ai bilong Ramu NiCo wokman Andrew Kami long Madang



HEO Michael Kalal bilong Fred Hollows sekim ai bilong Ramu NiCo CA wokmeri Veronica Bonamedura.



Anda 18 Basketball i winim olgeta mak

EKSEKUTIV Opisa bilong Basketball Federesen bilong Papua Niugini, Joel Khalu, i tok, ol anda 18 nesenel sempionsip i winim olgeta mak.

Khalu em i dairekta bilong tonamen tu, i mekim ol dispela toktok long presentesen bihain long gren fainal resis bilong ol man na meri.

"Dispela i namba wan Nesenel Sempionsip resis bilong ol anda 18 we BFPNG i kamapim bipo yet na resis i kamap namba wan tru," Khalu i tok.

"Insait long 4-pela de, yumi i lukim olsem resis kamap namba wan long divisen bilong ol man na meri wantaim na ol lain i gat bikpela amamas long lukim dispela resis moa.

"Resis i soim ol namba wan stail bilong basketball we yumi i gat long olgeta

hap bilong Papua Niugini na bihain long dispela tonamen i pinis gut, Federesen i amamas long ol plen bilong em long hostim and 17 na anda 15 Nesenel Sempionsip wantaim long yia i kam," Khalu i tok.

OI NCDABA i winim gran fainal bilong ol man na meri wantaim, we ol i bin daunim Pot Mosbi Basketball Lig bilong ol meri, 63-38, long Taurama Akwatik Senta.

Mt.Hagen i daunim ol Kerema, 79-67, long namba tri na foa plei-of long resis bilong ol meri.

NCDABA i daunim ol PNG Basketball Lig bilong ol man long gran fainal wantaim 70-65 poin.

OI Daru i kamap namba tri ples long divison bilong ol man bihain long ol i daunim ol Kupiano, 79-67.



OI meri NCDABA i sanap bung wantaim na i soim tropi bilong ol

Poro i win yet

OL Lae Bisket Poro i win yet long Lae Futbol Asosiesen resis bilong man long las wik Sande na i lukluk long go long fainal.

OI i bin danim ol birua bilong ol, Blue Kumul, wantaim 5-0 poin.

OI Poro i soim namba wab kala na stail bilong ol we ol i bin strongim banis bilong ol na i kamap wantaim planti gol, tasol ol i tok tenkyu long gol kipa bilong ol, Ismael Thai, husat i sevim planti gol egensim ol Kumul.

OI Kumul i bin gat sans long skorim namba wan gol bilong ol we straiika bilong ol, Colin Rimbao, i straikim bal, tasol beklain bilong ol Poro i strong tumas.

Pilaia bilong ol Poro, Troy Gunemba i bin malolo insait long tupela wik na i kam pilai we em i bin mekim wanpela futwok na salim bal i go long Obed Dika, husat i kisim namba wan gol bilong ol long namba 14 minit



Pilaia bilong ol Blue Kumul, Robert Daba, i laik trikikim bal taim pilaia bilong ol Poro i kam long kisim bal long em.

bilong resis taim.

Peter Dabinyaba i skruim skoa bilong ol i go antap long 2-0 bihain long 15 minit na ol i bin bungim taim bilong malolo.

OI Poro i soim stail bilong ol gen long namba tu hap bilong resis we ol i no givim liklik sans long ol Kumul.

OI i skruim skoa bilong ol i go antap long 5-0 wantaim

3-pela gol long namba tu hap na i stap namba foa ples long lata bilong resis.

OI gem i stap yet bai kamap bipo long ol fainal resis bai kamap long stat bilong mun i kam.

OI tim husat i resis strong long kisim top ples long lata em City United, Bumayong United, Zilu Scientific West na Eriku Wawens.

Notwes spot salens i kamap long mak

KOMYUNITI spot resis long Pot Mosbi Notwes i kamap long mak gut long las wiken long Holide Inn hotel wantaim ol presentesen bilong ol tropi na kes prais mani i go long ol pilaia na tim.

Namba wan program i kamap long mak gut we moa long 4,000 manmeri long ol 10-pela sebab bilong Notwes eria i pilai long tupela spot, Tas Ragbi na Volibal, wantaim 208 klap i resis.

Moa long 2,000 man i bin resis long ol wod 7,8,10 na 11 long 'A' na 'B' divison bilong ol man long Tas Ragbi na long volibal resis em moa long 2,100 man na meri bilong ol 10-pela sebab i resis.

OI 10-pela sebab husat i resis long dispela program em Hohola, Hohola Not, Boroko, Gordons, Gordons Not, Erima, Saraga, Waigaini, Morata na Gerehu.

Mani mak long K100,000

kes wantaim ol tropi em ol i bin givim long ol wan wan pilaia na tim we Minista bilong Helt na HIV/AIDS na Memba bilong Mosbi Not Wes, Michael Malabag, i sponsa wantaim sapot bilong NCD.

OI sempion bilong ol wan wan divison long wan wan sebab i winim K5,000 kes wantaim tropi taim ol tim i kamap namba tu i winim K2,000 kes wantaim ol tropi.

Bomana i hostim skoa salens

SOKA salens bilong Nesenel Kapitel Distrik Pablik Sevent Soka Asosiesen (NCDPSSA) i statim sisen bilong ol long tripela wik i go we 20 tim i resis aninit long 6-pela divison.

Taim ol i wok yet long ol fesiliti o ples bilong pilai we

FIFA Anda 20 Wol Kap resis bilong ol meri bai kamap, dispela resis i kamap long Bomana, klostu long Polis Kolis.

OI gavman dipatmen i sapotim planti tim bikos planti wok lain bilong gavman i pilai tu.

OI i bin kliaim tupela bikpela hap bilong pilai taim ol gem i kamap gut long ol tripela wik i go, we klostu long 30 tim aninit long 6-pela divisen, 'A' lig bilong Man na Meri, 'B' lig bilong Man na Meri na Anda 19, i inapim tupela pilai hap.



SOKA salens bilong Nesenel Kapitel Distrik Pablik Sevent Soka Asosiesen (NCDPSSA) i go het long Bomana.

OI Bara i win wantaim tupela wicket

OL Hebou PNG Baramundi i dainim Eastern Edge wantaim tupela wicket long raun namba 5 reis bilong Saut Australian Kriket Asosiesen (SACA) Premia Lig.

OI Bara i statim resis bilong ol gut we Tony Ura na Vani Vagi Morea i opim poin bilong ol wantaim 79 ran.

Lega Siaka na Assad Vala i lusim 18 wicket bilong ol Bara, tasol ol u luk orait taim Sese Bau na Morea i kisim 3/107 wicket.

Timothy Oakley bilong ol Eastern Edge i rausim Morea, tasol namba wan pilaia, Mahuru Dai, i helpim na lukautim ol Bara long kamap wina.



Tupela pilaia bilong Hebou PNG Baramundi i sikan bihain long ol i win.

Bau na Chad Soper i helpim Mahuru wantaim 21 ran long nem bilong em.

OI Bara i winim mak long fainal bihain long ol i lus wantaim 8-pela wicket.

6-pela pilaia i joinim ol Kapul

KOSA bilong Papua Niugini Kapul, Flemming Serritslev, i makim 6-pela nupela pilaia long joinim ol skwat long taim ol i mekim wok redi long resis long namba tu lek bilong 2018 Wol Kap kwalifaia long yia i kam.

Ol nupela pilaia husat i joinim ol Kapul em midfilda bilong Lae Siti Dwellers, Troy Gunemba, bikpela brata bilong em, Raymond Gunemba, Nigel Dabinyaba na Obert Bika.

Ol narapela nupela pilaia em Giwi Simon, Kenneth Pailau, John Ray na tupela brata, Kolu na Ati Kepo, bilong Kalo viles, Sentrel Provins.

PNG Kapul em i soka tim bilong ol man we ol bai bungim ol Tahiti long namba wan resis long Pot Mosbi long Mas 20, 2017.

Serritslev i tok em i makim ol nupela pilaia bilong givim ol sans long trening wantaim ol skwat.

Kosa i tok, tupela pilaia bilong Kalo viles i soim gut kala bilong tupela bihain long tupela i pilai long Sentrel Kap tonamen long dispela yia we Hekari i sponsa long en.

“Mi makim tupela long lukim kala bilong tupela taim ol bai pilai egensim ol top senia pilaia na wankain long ol narapela pilaia bai gat sans long pilai bilong kantri long bihain taim,”

Serritslev i tok.

Kosa i makim ful tim asde taim olgeta 5-pela pilaia husat i save stap long Solomon Ailan i kam long kantri.

Ol pilaia husat i save stap long Solomon Ailan em skipa David Muta, fowod Tommy Semmy, difenda Koriak Upaiga, Daniel Joe bilong Marist FC, na Michael Foster bilong Malaita Kingz FC.

Olgeta 5-pela pilaia i save pilai long semi-profesenel Telekom S-Lig long Solomon Ailan.

Raymond Gunemba i save pilai long Nu Silan na Nigel Dabinyaba i save pilai long Australia i bin kam long kantri long Tunde long bung.

PNG Kapul plen long mekim tupela bung na dispela em i namba wan bung bai kamap long Novemba we ol bai makim fainal tim.

Ol Kapul i pasim tok pinis long pilai poroman resis egensim ol Malaysia long Novemba, bihain long namba tu bung.

PNG i stap long pul long grup B wantaim Solomon Ailan na Tahiti. Wina bilong dispela kwalifai resis bai pilaia egensim namba faiv ples tim bilong Saut amerika long kisim wanpela ples long resis long FIFA Wol Kap resis bai kamap long Rasia.

Ol Warrior i daunim Eagle

OL Helifix Warrior i daunim ol KSS Eagle, 24-0, long Pot Mosbi Seabean Ragbi Lig resis long Kone Tiger pilai graun, Waigani, long las wik Sande.

Ol pilaia husat i bin putim 5-pela trai long daunim ol Eagle em pulbek, Teny Onguglo, senta pilaia, Kamex Moi, hapbek, Thomas Caspar, na fowod, Ismael Emende. Tripela konvesen kik i no go insait.

Ol Warrior nau i stap long namba 4 ples long lata na resis i kamap long las wiken em i las raun bilong Pot Mosbi Ragbi Lig sisen.

Kodineta bilong resis, Yanga Harupa, i tok olsem i gat sampela liklik asua i bin kamap long sampela 'A' gret tim na anda 20 wantaim we sampela gem em ol i no bin pilai. “Ol i ranim ol dispela gem namel long dispela wik,” Harupa i tok.

Ol Bears i kamap maina premia bilong 'A' gret na ol Morata Swan i kamap maina premia bilong anda 20 aninit long top 12 tim.

Ol fainal bai stat kamap long dispela wiken.

FIFA Wol Kap resis bai kamap klostu taim

FIFA Anda 20 Wol Kap resis bilong ol meri bai kamap long mun i kam, Novemba 13, we ol opisal i tok, kontrakta husat i stretim ol hap bilong pilai bai pinisim ol wok long pinis bilong dispela mun.

Ol Lokal Ogenaising Komiti (LOC) bilong FIFA Anda 20 wol kap resis bilong ol meri na Papua Niugini Futbol Asosiesen (PNGFA) i gat strongpela tingting olsem tupela mini stediam we ol kontrakta i stretim bai pinis long pinis bilong dispela mun.

Presiden bilong PNGFA,

David Chung, i makim maus bilong ol LOC na i tok olsem, ol hap bilong resis bai redi bipo long gem i stat long neks mun, Novemba 13.

Long wankain taim, Sif Eksektiv Opisa bilong LOC, Seamus Marten, i tok, insait long liklik taim i stap yet bipo long gem bai stat, komiti bilong em i wok strong long olgeta samting bai kamap orait bipo long ol tim bai kam.

Em i toktok tu long tupela ogenaiesen bilong gavman, Air Niugini na Telikom PNG,

i pren wantaim LOC olsem nesenel sapota.

“Em i bikpela samting long lukim ol bisnis long PNG i stap baksait long dispela resis bilong wol bai kamap long soim ol prodak na sevis bilong ol.

“Taim Telikom PNG na Air Niugini i sanap pinis long sapot, mipela i laikim ol narapela 4-pela nesenel sapota i ken helpim tu long kamapim dispela tonamen,” Marten i tok.

Em i tok moa olsem LOC i redim ol haus slip bilong ol tim pinis.

“Royal Papua Niugini Konstabuleri (RPNGC) em i bikpela ejensi long sekyuriti na ol bai lukautim ol lain bilong pilai long taim bilong resis. Na ol narapela stekholda tu bai wok bung wantaim ol RPNGC long strongim sefti bilong ol pilaia na tim,” Marten i tok.

Ol kantri bai kam resis long FIFA Wol Kap em Brasil, Ripablik bilong Korea, Not Korea, Sweden, Canada, Japan, Nu Silan, Ghana, USA, Jemeni, Meksiko, Venezuela, Nigeria na Frans.

Raukele i go insait long fainal

TIM Raukele i go insait long ol fainal bilong Fairfax Harbor volibal resis bihain long ol i daunim J.P Sharks long A gret preliminar fainal bilong ol man long Pot Mosbi insevis kolis volibal pilai

graun long las wiken.

Long namba wan na namba tri set, ol Shark i bin mekim gut, tasol ol Raukele i bin kisim gutpela poin long ol fainal set na daunim ol Shark.

Ol Raukele i bin 12 poin long ol 18 spaik long fainal set na dabolim skoa bilong ol Shark long fainal set.

Dispela win i skruim ol Raukele i go insait long ol semi fainal bilong A gret na ol Shark i go aut long top foa fainal bilong Fairfax sisen.



Pilaia bilong Raukele i laik spaikim bal na tripela pilaia bilong ol Shark i blokim.

PNG bai lukautim Osenia anda 15 sempionsip

BOD bilong FIBA Osenia i makim Pot Mosbi, Papua Niugini, long lukautim 2018 Osenia Yut Anda 15 Sempionsip.

Dispela sans em i nupela aidia bilong FIBA Osenia long promotim na developim level bilong basketbal long PNG na rijon.

FIBA Osenia bai tokaut bihain long ol taim bilong Osenia Yut Sempion resis bai kamap.

Eksektiv dairekta bilong FIBA Osenia, David Crocker, husat i lukim pinis bilong Pasifik Gem i bin kamap long 2015, i kamap namba wan tru na i tok, gem i kamap bikpela long kantri na rijon.

Crocker i tok, wantaim ol wol klas feseliti long Pot Mosbi na wantaim namba wan menesmen long federesen, FIBA i amamas long kam bek long kantri long 2018.

Sif Eksektiv Opisa bilong PNG Basketbal Federesen, Joel Khalu, i tok moa olsem dispela intenesenel iven bai groim spot long kantri.

Khalu i tok, pilai long asples i ken helpim ol long hapim level bi-

long pilaia husat i makim PNG na i resis olsem ol i mekim long taim bilong 2015 Pasifik Gem.

“Ol etlit i amamas long resis

long ai bilong ol asples sapota bilong ol. Na mipela i gat gutpela tingting olsem, taim anda 15 nesenel tim i go insait long pilai

graun long 2018, dispela sapot em i bikpela samting bai pusim ol pilaia bilong mipela i go antap long nupela level,” Khalu i tok.



Anda 18 tim husat i resis long nesenel sempionsip i kamap long las wiken. Eksektiv Opisa bilong Basketbal Federesen bilong Papua Niugini, Joel Khalu, i tok dispela resis i winim olgeta mak.

TNT Nesanel Swimming Sempionsip

Poto Eksen i kamap long Mosbi long Wiken

Planti ol Swima long Mosbi na Lae i bin stap insait long dispela Sempionsip na planti bilong i kamapim gutpela timing long nem bilong ol. Sampela bilong ol biknem swima bilong PNG i bin stap insait long

dispela sempionsip tu long strongim timing bilong ol. Long poto bai yu lukim sampela bilong ol kosa tu tu i kisim wanpela wik skul i kam long FINA wantaim helpim bilong BSP.



Ryan Pini wantaim wan swima bilong em kisim medol bilong tupela.



Ol liklik swima bilong Boroko Swimming klab na Lae summing klab i redi long go insait long pul.



Tonie Akunai i kisim medol bilong em. Stonie i kamapim gutpela timing bilong em.



Ol meri redi long mekim bek strok swim.



Haoda Seri i kisim setifiket bilong em olsem kosa bilong swima long han bilong tisa bilong em. Haoda wantaim ol narapela kosa bilong ol narapela provins bin stap insait long wanpela wik trening bilong ol kosa long Mosbi. FINA na BSP i go pas long dispela trening.



Ol man swim i statim fri stail.



Ol swiming kosa wantaim setifiket bilong ol bihain long wanpela wik skul.



Ol man swima i statim fri stail.

Ol poto: Nicky Bernard



DIANA White
WHITE TUNA FLAKES
DIANA
Barbecue Flavour

WHITE TUNA insait K 2.20

Tasty and Flavourful *White Tuna* for Everyone!

Manufactured by: RD Tuna Cannery Ltd.

PNG etlit laikim klinpela siti na kantri

Frieda Sila Kana i raitim
KLINIM siti, klinim kantri em i wok bilong yumi olgeta.

Wantaim nupela singaut bilong "Klinim Pot Mosbi Kempen" we Nesenel Kapital Distrik Komisen i bin opim long las wik, ol biknem PNG etlit olsem Dika Toua na Chris Amini i bin sanap na tokaut olsem ol tu i laik putim han long klinim siti na kantri.

Sastenebel Kostlain PNG i bin askim ol biknem spot man na meri olsem Gol Medal wina bilong PNG long Weitlipting, Dika Toua, na pastaim Kepten bilong PNG Kriket, Chris Amini, long kam wantaim na sapotim dispela singaut bilong lukautim en-vairomen na wes menesmen.

Chris Amini i tok, em i laik askim olgeta lain long wok olsem wanpela tim. Em i tok wankain olsem wanpela tim, olgeta wan wan pilai i gat hap wok bilong ol yet long mekim.

"Yumi gat ol bikpela gem o pilai bilong wol i wok long kamap long kantri bilong

yumi olsem nau bai yumi lukim FIFA Anda 20 Wol Kap resis bilong ol meri, na yumi mas wok wantaim long

lukautim ol pipia bilong yumi" Mista Amini i tok Long wankain taim, Olimpik gol medalis long

weitlipting, Dika Toua, i tok em i laikim tumas kantri bilong en olsem na em i laikim ol etlit bilong wol i kam, ol i

mas lukim siti i klin na ol bai amamas long stap. "Olgeta taim mipela ol etlit i save go long ol nara-

pela kantri long pilai, namba wan samting mipela i save luksave long en em, ol klinpela siti ol dispela kantri i gat. Olsem na em i wankain long ol narapela etlit bilong narapela kantri tu.

"Taim ol i kam namba wan taim long siti bilong yumi bai ol i lukim sapos em i klin o i no klin. Mi olsem wanpela Rol Model o gutpela piksa bilong spot na olsem wanpela meri, mi bin wok long helpim ol Wol Vision long klinim ples bilong mi yet, Hanuabada wantaim sapot bilong Nu Silan gavman."

"Long 2014 taim mi kam bek long Olimpik resis, mi bin lukim ples i doti tru, na mi sori tru." Mis Toua i tok.

Em i tok moa olsem ol pipel i mas yusim ol tripela 'R' em Reduce, Recycle, Reuse, long rausim ol pipia.

"Yumi mas skulim ol pipel bilong yumi. Bikpela samting em yumi mas go long ol skul na lainim ol sumatin na bai tenis i kamap," Mis Toua i tok.



Poto: L-R, Dorothy Elliot, Kenidet bilong Mis Pasifik Pejen resis, Gol Medal wina bilong PNG long Weitlipting, Dika Toua, wantaim pastaim Kepten bilong PNG Kriket, Chris Amini. Poto: Nicky Bernard.

Valvoline

PMV
DIESEL OIL

PMV OIL BILONG YUMI

BOROKO MOTORS

PORT MORESBY	325 5255
LAE	472 1144
MT HAGEN	542 1933
TABUBIL	649 9048
KIMBE	983 5035
MADANG	422 2659
KOKOPO	982 8193
GOROKA	532 3552

Email: info@borokomotors.com.pg
Website: www.borokomotors.com.pg